

Korokboon

Ari Komo Keraneen kuu Yesu Keresumbed Korokboon Ye Buk

Korokboon Buk Komo Dowad Wongkoon

Apaso Yoonbed buk kee wongkoon, Patmos dudbi angkambed. Anam andiwendan yaa kuu durud yewed konde yenbandi yemooon meneboka kangdommo doberembirime ande wongkoon. Kwane, aron yeenbon arimbed komo keraneen Yariman Yesumbed ye yaa wane korokbene daanoona wongkoon. Wongkoon ye weeb kuu AD 95 areb.

Korok Weng

1. Ambobandi Weng Ibduruk (1:1-3)
2. Anam Andiwendan Yaa Amun Kerundi Weng (1:4-8)
3. Yariman Yesumbed Yoon Yaa Wane Angkane Dakmoon Ye Weng (1:9-20)
4. Kambong Ediib Ye Anam Andiwendan Yaa Ongkandi Ye Weng (sapta 2-3)
5. King Ye Ooni Ye Dibirimboniib Buk Bedmiweniib Sibi Manayiib Yi Weng (sapta 4-5)
6. Buk Bedmiwen Yaa Dere Dere Karangkiwen Ye At Nunung Ediib Ye Weng (6:1-8:1)
7. Kibi Ediib Yi Weng (8:2-11:19)
8. Wonong Yoom Arud Yi Yoom Yi Weng (sapta 12)
9. Arud Dingkan Ayoowiib Yi Weng (sapta 13)
10. Sibi Mana Yoom Ye Nimakarub 144,000iib Yoom Yi Wengiib Engyu Ayoobmimiib Yi Wengiib (sapta 14)
11. Meneki Wongdem Ediib Ye Weng (sapta 15-16)
12. Kiwaan Ari Ye Wonong Aningko Darewoowiib Babilon Yu Weng (17:1-19:5)
13. Yesu Ikakman Mananeen Ye Weng (19:6-21)
14. Weeb Tauseniib Ye Weng (20:1-6)
15. Godbed Seten Dabab Konaneen Ye Weng (20:7-10)
16. Yeenbon Wengyundi (20:11-15)

17. Ewen Yewewiib Okad Yewewiib Yerusalem Yewewiib Yi Weng

(21:1–22:5)

18. Yeenbon Andedme Kebeni Weng (22:6-21)

1 ¹Weng kee ari komo keraneen Yesu Keresumbed ye korokbi ye weng. Weng kee Godbed ye yaa konoon, God ye demedan yaa amaan ari komo keraneen korokbi dowad konoon. Yembed korokboon ye weng kuu ye engyu yedmoone ye deme karub Yoon ne yaa menene kawoon. ²Ne kuu God ye wengiib Yesu Keresumbed komo kamoon ye wengiib korem wedmaan kwande korokbaan kei.

³Kane kanembed profesi weng kee kimingkaniib kuu Godbed amun kerundaneen. Kane kanembed weng keyaom wongkoon kuu wengamberekorib yi niindem aom kowiwen kuu kwangkong Godbed amun kerundaneen, amborom kuu aron kuu dia kereen kowe.

Yoonbed Kubendi Weng Keendoon

⁴⁻⁵Ne kuu Yoon, nembed kerek kee ambibkin Esia kambong kambong ediib Yesu yaa anam andekorib nedbe kurikuri kamimaibdan yaa wongke keendaan kii.

Anuk doborooniib kibik doreeniib aman ari dobaraneeniib kuye God yoom, aromkono ediib ye Kingkin God ye ooni ye dibirimbon arinambo ari doberembirimaan yoom, anammo korokbendimaan ye karub, bobni yaa kuu yedin wadkeron ye karub, okad yiri ye king korem yi korok, Yesu Keresu kui, ye yoom kumbed, mimyob dowaken kabamoon keendiyiib yewenub kondiyiib kuu yiib yaa bangkandok.

Yembed nub yaa mimyob dowaken keendimaan. Kwane, ye umkanbed nub dowad amoddene, ⁶nub be ye oonimbon aom ben nongkobene, ongmoone God dore nimakarub dore wedyiri dobiridan kere ye Ambe God ye deme awinuwen. Kwani kowe, ye yaa nambiriyiib aromkonoyiib kerok, aron korem korem. Anam kwanok.

Yesu Mananeen Kii

⁷Kedi, Yesu kuu wiib arimbed mananeene,
nimakarub korem kuu yi indowiib wedmenaniib,
kane kanembed ye kaare ayiwen kangkon wedmenaniib.
Kwane, okad yiri ye nimakarub korem kuu wedmenenib yuudane
ameng kamenabaniib.

Anamaa, kwananeena.

⁸Kwane, Yariman Godbed yedmoon, “Ne kuu Andowoon Ye God, angkon, Yimin Wandaneen Ye God kui. Anuk dobaraan, kibik doriin, aman ari dobaraniin, kuu ne kei. Aromkono Korem Ye God kuu ne kei.” andoon.

Karub Ye Mingki Wedmoon

⁹Ne kuu Yoon, yiiib kuristen angkodmi. Yesu ye dowad kuu durud yewed ye dabab neya yiiwa yaa menebeena, nub yaa awandoona, yodbiriban iwari kere kangdommo doberemberenub God ye kuuk aombed ye demedan keruwen kuye karub kuu ne kei. Kwane, ne kuu God ye wengiib Yesu komo kamoona wedmaan ye wengiib dakmaan kowe, nenwene Patmos dudbi yaa domowiwen. ¹⁰Kwane, Yariman yaron Sande ari keruune, Kingkin Karadmo kuu ne yaa ibnewoon. Kwanoone, ne yoman anuk wengambaraane, wengmo kuu kibi kuweng naawonmo baandimaib areb baandoon. ¹¹Kwane yedmoon, “Komo wedmaneeb kuu buk bedmi aom wongke. Wongkekoreb, kambong ediib anam andiwendan nedbimaib yaa nongkobende. Kambong aningko kuu Efesus, Smeena, Peegamum, Taiyatira, Saadis, Filadelfia, Laodisea kui.” andoon.

¹²Kwanoone, ne kuu amonombe yoman anuk weng ku daaween kuu wedmande kamaan. Kwane, amonombeni goldbed ongmiwen ye lem denobimaanbon ediib wedmekori, ¹³nambiri dobirimbon kuyaom kuu karub maa Karub Ye Mingki areb, ebkad doboob derenoone kawene yon kong yiri keroon. Kwane, idkono nong goldbed ongmiwen kumbed kawurimboniib kuu ye abadkono yaa awanewandoon. ¹⁴Ye awungiib korokiib kuu kawanmo sibiyyiib on kawayiib yi kimi areb. Kwane ye indob kuu amot yumbu areb. ¹⁵Ye yon kuu broons od murubkob yeweb kwamune areb kawurimboniib kui. Kwane, ye weng kuu ok benbon kuweng areb. ¹⁶Ye dingki wiwi angkambed mindong ediib awingkoon. Kwane ye mongkodem aombed kerewang angkara arud angkara arud kuu yeedureen. Ye murubia kuu aron yu nambiri areb.

¹⁷Kwane wedmekori, ye yon yiri kombereni bobnemoon areb keraan. Kwanaane, ye dingki wiwi kuu ne ari kowene yedmoon, “Eb unaab. Ne kuu Andowoonman angkon Yimin Wandaneenman. ¹⁸Ne kuu Wad Doriinman, ne bobnaan kumban ika dembe wadkeraan kuu aron korem korem yeman kii! Bobni ye kiiyyiib yoworiwenbon ye kiiyyiib kuu nembed awinaan.

¹⁹“Kwani kowe, komo keroonkob wedmeweniib kibirebya wedmeewiib aman ari komarewa kamaneene wedmaneewiib kuu wongke. ²⁰Mindong ediib ne dingki wiwi ari dangeeniib lem denobimaanbon ediiwiib wedmewen ye weng id bikdereboon kuu kei. Mindong ediib kuu anam andekorib nedbe kurikuri kamimaibdan kambong ediib aom doriib yi ooni ye engyus ediib Godbed ben nongkoboan kui, angkon lem denobimaanbon ediib kuu anam andekorib nedbe kurikuri kamimaibdan kambong ediib aom doriib kui.” andoon.

Weng Kee Anam Andiwendan Efesus Aom Doriib Yaa

2 ¹“Weng kee anam andiwendan Efesus aom doriib yi engyu yaa ande kowandamaan kowe wongke.

“Mindong ediib ye dingki wiwi angkambed awingkekore nambirimbon ediib kuyaombed dewonoon ye karub kuu ne kei. Ne weng kuu kei. ²Yiibbed komo kamenib deme yobdood ambangkiuwe dabab meneboone kangdommo doriib kuu nekaadkeraan. Ambarakmidan kane kanembed yika yi dowad dudi wengbed nub kuu apasodan kii andimaib kuu, yiibbed yi komboon darobe wedmiwen kuu yi dudanabi wedmiwen kowe yiibbed wunekariwen. Nekaadaa. ³Kwane, yiib kuu dabab meneboone kangdommo doronib ne dowadbed durud yewed kandiwen kumban, yiminban keruub kii ande korondindo.

⁴“Kumban nembed yiib yaa dowakenban keraan kuu, kibikee yiib kuu ne yaa ibduruk anuk mimyob dowaken keewimaib kwamune areb kamokban keruwen. ⁵Kowe, ibduruk anuk ye mimyob dowaken keewiwen yaa monkone meenime! Kwamunekob, ambarakmi yaa koronde amonombe ibduruk anuk kamiwen areb kamime. Kwanokban keraniib kuu nembed mene yiib nambirimbon kuu kankoraraniin. ⁶Kumban Nikolasbed kedmengkandeenkob ambarakmimaibdan^a kuu nembed norin keendimain areb, kwane yiib kangkon norin keendimaib kowe, nembed yiib yaa kuu amun andaan.

⁷“Kanembed kerendemiib keroka, Kingkin Karadmombed anam andiwendan yaa ke dakmeen kee wengamborok. Kanembed arewa menebanean yaa ninabone burudandaneen kuu nembed ye yaa wadkeri ye ayob God ye amunbon angkambed demboon kuu yembed ani kuu yimin ande kowaniin.

Weng Kee Anam Andiwendan Smeena Aom Doriib Yaa

⁸“Weng kee anam andiwendan Smeena aom doriib yi engyu yaa ande kowandamaan kowe wongke.

“Andowoonman angkon Yimin Wandaneenman, bobnoon yirimbed ika demboonman kuu ne kei. Ne weng kuu kei. ⁹Yiib dabawiib kamboknon keriweniib kuu nekaadkeraan. Kumban anam kuu Ewen ari kuu yiib barang yemoon dangoon. Kwane, karub yena nub kuu Godbed kinoondan andimaib kumban anam kuu Seten yaa dabokniwen kumbed yiib aningko kankubuni dowad weng arewa daandimaib kuu nekaadkeraan. ¹⁰Yiib kuu durud yewed kandandamiib kuu kuyaa unaib. Nembed yiib yaa yedmaan kuu, yiib yena kuu awad arewambed ben komboon darobi dowad wii aom kambaraneen. Kwanekore yiib kuu dabab kan kondene yenbandaneene aron angko angkoyiib durud yewed kandaniib kii. Kowe, yiib kane ne yaa anam andiwen kuu ma korondiyiibbanbed kangdommo dobirime, yenambed yiib yaniuwe duknaniib kwangkong ma korondiyiibbanbed kangdommo dobirime. Kwananiib kuu nembed yiib

^a 2:6Yi kuu kuristen inameniib nenem inameniib dabokniwen.

yaa kangdommo doboriwen ye kakman korok ari derene wadkeri kandi yeman kondaniin.

¹¹“Kanembed kerendemiib keroka, Kingkin Karadmombed anam andiwendan yaa weng ke dakmeen kee wengamborok. Kanembed arewa menebanean yaa ninabone burudandaneen kuu angkon anam andindodan yi kingkin bobni yeman kuu ye yaa ma dedmonaanban.

Weng Kee Anam Andiwendan Peegamum Aom Doriib Yaa

¹²“Weng kee anam andiwendan Peegamum aom doriib yi engyu yaa ande kowandamaan kowe wongke.

“Kerewang angkara arudiib angkara arudiib ye karub kuu ne kei. Ne weng kuu kei. ¹³Yiibbed kunayambed doriib kuu nekaad, kuyaa kuu Seten ye ooni ye dibirimbon kui. Kumban yiib kuu ne yaa anam andi kuu awine doboriwen. Kwane, Antipas ne weng kanyare dakmemboroon ye karub kuu yiib siti aom Setenbed dobirimaan yaambed ayiwen, kumban yiib anam andi kara ne yaa kuu korondindo.

¹⁴“Kumban ne kuu yiib yaa dowakenban keraan ye weng yedmandamiin. Yiib nimakarub yena kuu Balaambed kedmengkandoon ye yoman yaa winiwen. Kurin kurin kuu Balaambed Balak yaa kedmengkandoone, Balakbed Israeldan yaa dudi god ye kuruwak yaa animan nengke nongkobimaib kuu aniyiib nenem kami karayiib kuu kwane kamime ande dedmobendoone ambangkiwen. ¹⁵Kwane areb kuu yiib yena kuyaom kangkon Nikolasbed kedmengkandeenkob ambarakmimaibdan keruwen. ¹⁶Kwani kowe, ambarakmi yaa koronde amonombime! Kwanokban keraniib kuu, aron yemoonban ari kuu nembed yiib yaa meneni kane kanembed amonombindo doriibdan kuu ne mongkodem aom kerewangbed yaniin.

¹⁷“Kanembed kerendemiib keroka, Kingkin Karadmombed anam andiwendan yaa weng ke dakmeen kee wengamborok. Kanembed arewa menebanean yaa ninabone burudandaneen kuu nembed Ewen aom ye om mena bikdereboon kuu bangkanekori, angkon bot kawanmo kwari aningko yeeb wongkooniib kuu konaniine kandaneen kuu yena yikaadkeraibban, yembedmo aningko yeeb kuu yekaadkeraneen.

Weng Kee Anam Andiwendan Taiyatira Aom Doriib Yaa

¹⁸“Weng kee anam andiwendan Taiyatira aom doriib yi engyu yaa ande kowandamaan kowe wongke.

“God ye Mingki kui, ye indob kuu amot yumbu areb, ye yon kuu broons od murubkob yeweb kwamune areb kawurimbonmo kuu ne kei. Ne weng kuu kei. ¹⁹Yiibbed komo kamenib anam andenib mimyob dowaken keendenib yena yaa awandenib dabab meneboon yaa ne weng awinimo kamimaib kuu nekaadkeraan. Kibikee ambangkaib kee

deme yobdood ambangkaib ibduruk anuk ambangkiwen arebban kowe nekaadkeraan.

²⁰“Kumban nembed yiib yaa dowakenban keraan kuu, yiib kuu wonong maa Yesebeo dankarindo. Yu kuu yukareb ne kuu profesi weng wengambere dakmimain andenu, kwane ne demedan kuu yumbed ben nenem kami kiwaan ari nongkobendenu dudi god ye kuruwak yaa nengke nongkobimaib yaniman aniyiib kwane kedmengkandimaun kui. ²¹Nembed yu kuu yu ambarakmi yaa koronde amonombuk ande aron kondaan kumban, amonombi yaa kuu korondeen. ²²Kwane kowe, nembed yu kuu durud yewed ye anikad kondeni, kane kanembed yu yoom daboknenib nenem kamiwen kuu durud yewed miin arewa kondaniin. Kumban yikareb komarewa doriib kuu koronde ne yaa amonombaniib kumbed durud yewed kandaibban. ²³Kwane, nembed yu yoman winiwendan kuu yaniine yoworaniib. Kwananiine, anam andiwendan korem kuu yikaadkeraniib kuu, nimakarub korem yi inameniib meeniyiib kuu yekaadmo ye karub kuu ne kei, nembed nimakarub korem mimim kuu komarewa ambangkoon kuu kwanemo ingkandaniin kii. ²⁴Kumban nembed yiib yaa ke yedmendaan kei, yiib yena Taiyatira aom doriibdan kuu yu kedmengkandi kandindo, yiib kuu Seten ye biknimbon inamen kuu bindo kowe, ne kuu yiib yaa dabab ma kondainban. ²⁵Kumban yiib kuu komo yaambred yobdood awiniwen kuu kwane dobiribko ne mananiin yaron ari keruk.

²⁶“Kanembed arewa menebaneen yaa ninabone burudandene ne dowaken yaambred ambangkaneene wene aron yeenbon ari keranuun kuu, nembed ye yaa deme ye aromkono darewoob konaniin. Kukuu ambibkin korem ooni ye aromkono kui.

²⁷‘Kuye karub kumbed king ye aromkono yobdoodmo areb yi yaa oonaneen,

awurimbed meneki awene okad nunungbed ongmiwen kuu wowe monmare kuudmo keraneen areb kuu wabkad keraniib kuu dabab kondaneen.’

“Kukuu ne Ambe yaambred deme ye aromkono kuu kandaan kumbed ye yaa konaniin. ²⁸Kwane, nembed amkimo ye mindong ye yaa konaniin. ²⁹Kanembed kerendemiib keroka, Kingkin Karadmombred anam andiwendan yaa weng ke dakmeen kee wengamborok.

Weng Kee Anam Andiwendan Saadis Aom Doriib Yaa

3 ¹“Weng kee anam andiwendan Saadis aom doriib yi engyu yaa yedme kowandamaan kowe wongke.

“God ye Kingkin aromkono ediib mindong ediib awingkoon ye karub kuu ne kei. Ne weng kuu kei. Yiibbed komo kamiib kuu nekaadkeraan, yiib dowad yenambred yedmimaib, ‘God yaa anam andiwen kowe anam

wad doriib.’ ande kamiib, kumban anam kuu yiib kuu bobnemoon areb keriwen. ²Unuk dangiwen yiri kuu dembime! Yiib anam andi kuu embeng kere bobne weneen kowe aromne ambangkime, amborom kuu wedmaan kuu ne God ye indob ari kuu yiib ambangki kuu yimin kerindo kowe. ³Anukbed weng amun wengambere awiniwen kuyaa ika ongme meenime. Keye yoman wenenib yiib amarakmi yaa koronde amonombime. Kumban yiib unuk dangiwen yiri dembaibban keraniib kuu, ne kuu yid ye karub areb mananiin, kwane yiib kuu ne mini aron kuu yiibkaadkeraibban kii.

⁴“Kuned yiib yena Saadis aom doriib kuu yiib ebkad kuu koroomiibban. Kowe yi kuu ebkad kawanmo deebaniwe ne yoom wananuub, yi kuu yiminmo kamiibdan kowe. ⁵Kanembed arewa menebanean yaa ninabone burudandaneen kuu ebkad kawanmo deebiwendan areb ebkad kawanmo inwaraneen. Ye aningko kuu wadkeri ye buk aom kuu arainban. Kwane, Nambe yoom ye engyus yoom yi murubia arimbed ‘Ye kuu anam kuu ne karub kii.’ andaniin. ⁶Kanembed kerendemiib keroka, Kingkin Karadmombed anam andiwendan yaa weng ke dakmeen kee wengamborok.”

Weng Kee Anam Andiwendan Filadelfia Aom Doriib Yaa

⁷“Weng kee anam andiwendan Filadelfia aom doriib yi engyu yaa yedme kowandamaan kowe wongke.

“Karadmo anam ye karub, Dewid ye kiiyiib awinoon ye karub, ambongko nandaneen kuu karub maambed ma kebenaanban ye karub, angkon kebeneen kuu karub maambed ma nandaanban ye karub kuu ne kei. Ne weng kuu kei. ⁸Yiibbed komo kamiib kuu nekaadkeraan. Kedi, ne kuu yiib murubia arimbed ambongko nandaan kuu karub maambed ma kebenaanban. Nekaad, yiib aromkono kuu embengmo kuned, ne weng kuu awiniwen, ne yaa aadikmindo. ⁹Kedi, yenambed Seten yaa daboknenib yikareb nub kuu Godbed kinoondan andimaib kumban yi kuu dudanabidan. Yi kuu nembed be meneni yiib murubia arimbed nongkobekori kwane dakmime andaniine, yi kuu bumangkenib ‘Anam yiib kuu Yesu ye mimyob keendoondan.’ andaniib. ¹⁰Dabab menebanean yaa yodbirimban iwari kere kangdommo doberembirime ye weng yiib yaa yedme kowaan kuu ongme awiniwen. Kowe, kwane okad kumundin kiri doriibdan korem yaa komboon wedmi dowad dabab manandameen yaron ari kuu yiib kuu nembed oonendaniin.

¹¹“Aron dukmen ari kuu mananiin. Kowe komo anam ande kandiwen kuu kwane korobe awinime. Kwananiib kuu karub maambed yiib anam andi yaa awiniwen ye kakman korok ari dereni yeman kuu kandaanban. ¹²Kanembed arewa menebanean yaa ninabone burudandaneen kuu nembed ongmenaniine ye kuu ne God ye kurikuri boyambib darewoob

aom ye dongka areb keraneen. Kwane, ye angkon ambib kuyaa ika ma domondaanban. Kwane, nembed ye ari ne God yaningkoyiib ne God ye siti darewoob Yerusalem yeeb yu aningkoyiib wongkaniin. Siti kee ne God yaambad Ewen aombad kubudaranuun. Kwane, nembed angkon naningko yeeb ye ari wongkaniin. ¹³Kanembed kerendemiib keroka, Kingkin Karadmombad anam andiwendan yaa ke dakmeen kee wengamborok.

Weng Kee Anam Andiwendan Laodisea Aom Doriib Yaa

¹⁴“Weng kee anam andiwendan Laodisea aom doriib yi engyu yaa yedme kowandamaan kowe wongke.

“Anam Kwananeenman, komo wedmoon kuu kwamunemo anammo daandi ye karub, Godbed yimin yirimbed ongmenaboob ye ambokab kuu ne kei. Ne weng kuu kei. ¹⁵Yiibbed komo kamiib kuu nekaadkeraan. Yiib kuu niminiib arebban, ne yaa ongme anam andindo, angkon yiib kuu yurukiib arebban, ne yaa korem korondindo. Ne dowaken kuu maaaa keyareb o maaaa kui areb kerime andid ee! ¹⁶Kwane, yiib kuu nimin arebban yuruk arebban wedyamo kowe, yiib kuu ne mongkodkono aombad ingkokmandamaan kii. ¹⁷Yiibbed yedmimaib, ‘Nub kuu barang yemoon buwen kowe komo komo kuu yiminmo kii.’ andimaib. Kumban yiib kuu God yaa ambab kerenib, miin yiminban kerenib, kamboknon, indob tut, ebkadiibban keriwon kuu yiibkaadban keriwon kii. ¹⁸Nembed yiib yaa ke ongkande yedmendaan kee, ne yaambad amotbed dene koroomiibban keroon ye od gold moonime. Kwananiib kumbad biamodiib keraniib. Kwane, ne yaambad ebkad kawanmo moonime. Kwananiib kumbad idmo doriib ye karak kuu kebenaniib. Kwane, ne yaambad indob muramura moone ambime. Kwananiib kumbad indob kuu nandaneene kereknaniib.

¹⁹“Kane kane ne mimiob dowaken keendaandan kuu nembed yorokmo dobirime andi dowad ongkandeni dabab konde kedmengkandaniin. Kowe anam kuu yiib anam andi ongme awinime, yiib amarakmi yaa koronde amonombime. ²⁰Ne kuu kei! Ne kuu ambongko yaa dobere wangkain. Kanembed ne weng wengamberekore nandaneen kuu, awudaraniine ye yoom ne yoom ibmo ananuub.

²¹“Kanembed arewa menebaneen yaa ninabone burudandaneen kuu, nembed ye yaa yimin andaniine ne king ye ooni ye dibirimbon ari ye yoom dibaranuub, nembed ninaboni burudandeni Nambe ye king ye ooni ye dibirimbon ari ye yoom diburuwen areb kwane keraneen. ²²Kanembed kerendemiib keroka Kingkin Karadmombad anam andiwendan yaa ke dakmeen kee wengamborok.” andoon.

Ewen Aom God Ye Dibirimbon Wane Wedmoon

4 ¹Kuye yoman kuu wedmaane ne murubia arimbed Ewen ambongko kuu daandoon. Kuyaambad kibi areb wengmo baande dakmoon

kudin wengambaran kuu ika yedmoon, “Kari yaro kamenebko, kibikbed ari komarewa keraneen kuu korokbebda.” andoon. ²Kwanandoone, ne kuu Kingkin Karadmombed ibnewoon kuyaambed ne nen kawonoone wedmaane, Ewen aom king ye ooni ye dibirimbom ari kuu karuwiib dibeen. ³Karub ku dibeen kuyaambed bot omkadiib mongkodkadiib manimanandeb yaningko yaspeeyiib kaanilienib areb nambiri menengmenengiib angkadoroon. Kwane niin ari kuru kuu dibirimbom yaa awanewandoon kuu bot awoyebkadmo manimanandeb yaningko emerald areb nambiri menengmenengiib angkadoroon. ⁴Kwane king ye ooni ye dibirimbom kuyaa kuu ooni ye dibirimbom yena wad kaningiib kwane awanewandoon. Kwari kuu aamkono aamkono wad kaningiib kuu dibiib. Yi kuu ebkad kawanmo inware korok ari kuu king ye dereni yeman goldbed ongmiwen kuyiib deebiwen. ⁵King ye ooni ye dibirimbom kuyaambed imaka amkunia nambadayiib kmoon. King ye ooni ye dibirimbom arinambo ari kuu nambiri ediib naboroon. Kuku God ye Kingkin aromkono ediib kui. ⁶Angkon king ye dibirimbom ye okad kuu naknaamo, nambiri menengmenengiib karamok dabonmo areb, kwane ok kuruwak areb.

King ye ooni ye dibirimbom wedyiri ye angkara angkara awanewandiwen kuu dingkan kaningiib doriib, kwane yi murubia ariyiib angkurom angkayyib korem kuu indob yemoon. ⁷Dingkan ibduruk kuye murubia kuu laiyon areb, angkon dingkan maaa kuye murubia kuu buromakau ambi areb, angkon dingkan maaa kuye murubia kuu karub ye murubia areb, angkon dingkan maaa kuye murubia kuu on diba wanwinimaan areb. ⁸Dingkan kaningiib yi korem mimim kuu buraab benmeyyib kumbed yi id korem yaa kuu indowiibmo awanewandoon, kwane yi buraab dabderem aom korem kwangkon indowiibmo. Kwane awingyawiib amnoomiib korondiyiibban yedmimaib,

“Aromkonomo Ye Yariman God kuu
karadmo, karadmo, karadmo,

ye kuu anuk doboroon, kibik doreen, ari dobaraneen.”

ande kamembirimaib. ⁹Kwane dingkan kaningiib kumbed King ye ooni ye dibirimbom ari dibeen ye karub yaa nambiri kone yaningko darewoob arimbed kone eso andimaib, aron korem korem doreen ye karub yaa kui. ¹⁰Kwamiwe, aamkono aamkono wad kaningiib kuu king ye ooni ye dibirimbom ari dibeen ye arinambo ari bumangkenib ye aningko kankoonimaib, aron korem korem doreen ye karub yaa kui. Kwane yi korok ari king ye dereni yeman deebiwen kuu King ye ooni ye dibirimbom ari dibeen ye murubia ari nongkobekorib yedmimaib,

¹¹ “Nub Yariman, nub God, eb yaa nambiriyiib aningko darewoob ariyiib aromkonoyiib bangkabdi kuu yimin, amborom kuu ebed kumkam korem kuu ongmenabewen,

kwane eb dowakenbed ongmenabeebkob dange weneene doriwa.”
andimaib.

Yesumbed Buk Bedme Karangkoon Kuu Kandoon

5 ¹Kwane wedmaane beegod angkara angkara wongke bedmekorib dungkun yaa at nunungbed dere dere wene ediib kere karangkiwen kuu Kingbed ye ooni ye dibirimbon ari dibeen kuye dingki wiwi angkambed awinoone wedmaan. ²Kwanoone wedmaane aromkono darewoob ye engyu kuu naawon baande dakmoon, “Kane kuu aningko darewoob ariyiib kumbed beegod bedmen wene karangkiwen yeman daande aom wedmi kuu yimin?” andoon. ³Kumban Ewen ari doriibdaniib, okad yiri doriibdaniib, dukniwendaniib korem kuu beegod daande aom wedmindeban. ⁴Kwanoone, ne mimyob wandoone ameng darewoob kamaan, amborom kuu karub kanembed ye kuu aningko darewoob ariyiib kumbed yimin ande beegod bedmiwen kuu daande aom wedmindeban kowe. ⁵Kwane, aamkono maambéd ne yaa yedmoon, “Ameng kamaab! Yuda Ye Amyenimbon Yi Laiyon, Dewid Ye Ambokab kui, yembed burudandoon. Yembed at nunungbed dere dere wene ediib kere karangkiwen kuu daadme beegod dudmungkaneen kuu yimin.” andoon.

⁶Kwane wedmaane, Sibi Mana kuu aye kowaiwe bobnemoon areb king ye ooni ye dibirimbon wedyirimbed doreen, kwane angkara angkara kuu dingkan kaningiib aamkono aamkonoyiib kumbed awanewandiwen. Ye kuu indob ediib durub ediib. Indob kuu God ye Kingkin aromkono ediib kumbed Godbed yedmoone okad kumundin yaa weneboon kui. ⁷Kwane, Sibi Manambéd mene Kingbed ye ooni ye dibirimbon ari dibeenman ye dingki wiwi angka beegod bedmiweniib awinoon kuu kandoon. ⁸Kwane kandoone dingkan kaningiib aamkono aamkono wad kaningiib kuu ye murubia ari bumangkiwen. Yi korem mimim kuu yook yeman yaningko haap kuyiib goldbed ongmiwen ye yabad kobukmo aom baeb amun nengke koni yeman dembooniib kuu awingkiwen. Baeb amun nengke koni yeman kukuu God ye karadmodan yi kurikuri kui. ⁹Kwane, yimbed yook yeeb wingkiwen,

“Eb kuu aningko darewoob ariyiib kumbed,
beegod bedmiwen kuu kandeneb, at nunung karangkiwen daadmi
kuu yimin,
amborom kuu eene kowiiwe, ewumkanbed nimakarub kuu God ye
dowad amoddewen kowe,
kwanewen kuu amyenimbon mimim korem yaambéd weng mimim
korem yaambéd ambibkin mimim korem yaambéd kad mimim
korem yaambéd nimakarub amoddewen kii.

¹⁰Ebbéd yi yaa oonimbon mimodan ongmeneb

God ye deme awini dowad God dore nimakarub dore wedyiri
dobiridan kerundewen.

Kwane, yimbed okad ari oonaniib.” andiwen.

¹¹ Kwane wedmeni wengambaraan kuu kimingkinban ye engyu
yemooon kai King ye ooni ye dibirimbon awanewandiweniib dingkaniib
aamkono aamkonoyiib dooberenib ¹² naawonmo yook wingkiwen,
“Aye kowiwen ye Sibi Mana kuu aningko darewoob ariyiib kowe,
aromkonoyiib biamodiib meeni kangdomiib yiminmo dobiriyiib
aningko darewoob ari koniyiib nambiriyiib kubeniyiib ye yaa
bangkani kuu yimin kii!” andiwen.

¹³ Kwanandiwe, wengambaraane, wad doriibdan Ewen ariyiib okad
yiriyiib dingkaniib dukniwendaniib karamok yiri ye dingkaniib korem
kuyaom doriib kuu yook wingkiwen,
“Kingbed ye ooni ye dibirimbon ari dibeeniib Sibi Manayyiib yaa kuu,
kubi wengiib aningko darewoob ari kondiyiib nambiriyiib
aromkonoyiib kerundok,
aron korem korem kii!” andiwen.

¹⁴ Kwane, dingkan kaningiib kumbed yedmiwen, “Anam kwanok,”
andiwe aamkono aamkono kuu yiri bumangkenib yi ayoob yi aningko
kankooniwen.

God Ye Butun Kondi Dowad Yesumbed Beegod Karangkiwen Kuu Daandoon

6 ¹ Kwane wedmaane, beegod bedmiwen yaa dere dere karangkiwen
ye at nunung ediib ibduruk kuu Sibi Manambed daandoon.
Kwanoone, wengambaraane dingkan kaningiib mim kuyaa kumbed
naawonmo nambad areb baande yedmoon, “Mene.” andoon. ² Kwanoone,
ne murubia arimbed hoos kawanmo wedmengan kii! Kwarimbed monoon
ye engyu kuu anangkawiib dibeen. Kwane, ye yaa king ye korok ari
dereni yemaniib konoon. Kwanoone, wene bondan yenbande yare
burudandok wonoon.

³ Kwane, Sibi Manambed mamaa ayoob andi karangkiwen kuu
daandoone wengambaraane, dingkan mamaa ayoob andi kumbed
yedmoon, “Mene!” andoon. ⁴ Kwanoone, hoos mamaa dangkaro
monoon kuu, korem amoyidkob dodmo areb. Kwarimbed monoon
ye engyu yaa kuu okad yiridan yaa yewenub dohiri bongme arudmo
dobirime andi yaromkonoyiib man aye kowoon aye kowoon kamime
andi yaromkonoyiib bangkanoon. Kwanekore, ye yaa kuu kerewang
darewoowiib kan konoon.

⁵ Kwane, Sibi Manambed mamaa ayoobmim andi karangkiwen kuu
daandoone wengambaraane, dingkan mamaa ayoobmim andi kumbed
yedmoon, “Mene!” andoon. Kwane wedmaane, ne murubia arimbed hoos

binmo angkadoroon kii! Kwarimbed monoon ye engyu kuu yiribman ye dabab wedmi yemaniib awinoon. Kwane wonoonkob animan dowan kere weneen. ⁶Kwanoone wengambaraane, dingkan kaningiib kuyaombed wengmo yedmoon, “Animan dowan kerandameen kowe, wiit flawa yowo embeng mimo kuu aronki mimo ye deme ye od kumbed moonime. Baali flawa yowo embeng ayoobmim kangkon aronki mimo ye deme ye kakman kumbed berengkime. Kwane, oiyo nengkanabi yemaniib wain okiib kuu monmaraib!” andoon.

⁷Kwane, Sibi Manambed mamaa kaning andi karangkiwen kuu daandoone wengambaraane, dingkan kaning andi kumbed yedmoon, “Mene!” andoon. ⁸Kwanoone, ne murubia arimbed hoos wubkadmoyiib kuu angkadoroone wedmemaan. Kwarimbed monoon ye engyu yaningko kuu Bobni, kwane ye yoman anuk kuu engyu maa yaningko Yoworimbon kumbed ye dia monoon. Yi yaa aromkono kondoon kuu nimakarub kumundin aom kuu andangkane wenore kaningiib kerekore wenoriwen kuye mim angkara kumaom ye nimakarub kakumundin kuu kerewangiib mungi bobniyiib bob anikadiib okad yiri dingkan kiiwiib kumbed yenbandiwed yowori yeman.

⁹Kwane, yembed karangkiwen angko andi kuu daandoon. Kwanoone, dingkan nengke baeb konimbon wedmaan. Kuye dabderem aom kuu yenbandiwe dukniwendan yi kingkin wedmendaan, amborom kuu yi kuu God ye weng dakmenib God kuu anam kii ande korokbimaib kowe. ¹⁰Kwane, yimbed naawonmo baande kaamoniwen, “Yariman Ambengkan God karadmo anam, eb kuu aron komoyiib kerekorewed okad yiri ye nimakarubbed nub yiiwe duknuwen ye dowad wengyundeneb kakman kondaneeb?” andiwen. ¹¹Kwane, yi mimim kuu ebkad kawanmo bangkandekore yedmendoon, “Aron dukmen areb yiidkibko kwane wene yiiib kuristen angkodmia yiiib deme mimodan yenbandi dowad kinoondan kuu yi korem kuu yiiib yiwen areb kwane keriwed.” andoon.

¹²Kwane keenombaraane, karangkiwen kung andi kuu daandoon. Kwanoone, dowodki darewoowiib keroon. Aron kuu koronde karong binmo naningkod kimimbed karangkiwen kwane areb kereen. Wood kangkon koronde umkan ye dodmo areb kereen. ¹³Mindong kangkon yedob kuu nuub aromkonombed wuure okad yiri ben kiradmemoon areb kwane ambid arimbed kiobenabiwen. ¹⁴Ambid kuu beegod bedmemoon areb kwane bedmenmo wuneen. Kwane, aangkoyiib dudbiyiib kuu yi yumbon arimbed ben angkaneboon.

¹⁵Kwanoone, wedmaan kuu okad yiri ye kingiib aningkodaniib ana nangmidan yi korok dareb darewiib barang yemoondaniib aromkono darewoobdaniib yena yi dabderem yiri dobere no deme awinembiridaniib yika oonimaibdaniib korem kuu botdem aomiib aangko ari bot angkara angkara wedyiriyiib kuyaom bikderebiwen. ¹⁶Yimbed aangkoyiib boyiib

yaa yedmiwen, “Nub ari kirobenib, King ye ooni ye dibirimbon ari dibeen ye murubiayiib Sibi Mana ye noriniib kuyaa kuu yiiibbed nub dabune biknime. ¹⁷Amborom kuu yi norin wandi yaron darewoob ari kereen kowe, kanembed bobnaanban dangkoro dobaraneen? Dowan kii!” andiwen.

Israeldan 144,000iib

7 ¹Kwanoone, wedmaane engyus kaningiib kuu okad kariyiib kiriyiib kangkayiib kaomiib korem yaa doriib. Yimbed nuub korem kaningiib kuu angkon awingkiwen, kwanubko nuub kuu okad yiri o karamok yaa o at awene yaa wuruwokban kerok andiwed. ²Anuk yiri kuu engyus kaningiib keyaa okada karamoka monmari yaromkonoyiib kondoon. Kwane, engyu maaaa wedmaane ye kuu wad doreen ye God ye kumun kowi yemaniib awinoon kumbed aron yaro minimaun kangkambed yaro monoon. Kwane, yembed engyus kaningiib ke doriib keyaa naawonmo baande yedmoon, ³“Okadiib karamokiib ayiib kuu monmaraibned, mokorondibko God ye demedan yaa ye kumuniib yi binad ari dengkuuwa.” andoon. ⁴Kwanoone, wengambaraane Israeldan yi amyenimbon korem yaambd binad ari dengkoon kuu 144,000iib.

⁵Yuda yamyenimbon 12,000iib kuu dengkenabendoon.

Ruben yamyenimbon 12,000iib kuu kangkon kwamune.

Ged yamyenimbon 12,000iib kuu kangkon kwamune.

⁶Aser yamyenimbon 12,000iib kuu kangkon kwamune.

Naftalai yamyenimbon 12,000iib kuu kangkon kwamune.

Menase yamyenimbon 12,000iib kuu kangkon kwamune.

⁷Simeon yamyenimbon 12,000iib kuu kangkon kwamune.

Livai yamyenimbon 12,000iib kuu kangkon kwamune.

Isekar yamyenimbon 12,000iib kuu kangkon kwamune.

⁸Sebulun yamyenimbon 12,000iib kuu kangkon kwamune.

Yosef yamyenimbon 12,000iib kuu kangkon kwamune.

Benjamin yamyenimbon 12,000iib kuu kangkon kwamune.

Kadaareb Ebkad Kawanmo Inwariwen

⁹Kwanoone, angkon wedmaane ne murubia arimbed kadaareb yemoon karub kanembed kimingke dandindeban wedmendaan. Yi kuu amyenimbon mimim korem yaambd weng mimim korem yaambd ambibkin mimim korem yaambd kad mimim korem yaambd Kingbed ye ooni ye dibirimbon ari dibeeniib Sibi Manayiib yi murubia ari dohiriwen. Yi kuu ebkad kawanmo deebiwen kumbed yuum biidiib awingkiwen. ¹⁰Kwane, naawonmo baande yedmiwen,

“Nimakarub bobni yaa burudande bindi kuu

nub Godbed ye ooni ye dibiriimbon ari dibeeniib

Sibi Manayiiib kumbedmo yimin.” andiwen.

¹¹Engyus korem kuu King ye ooni ye dibirimbom yaayiiib aamkono aamkono yaayiiib dingkan kaning yaayiiib kwane awanewandiwen. Kwane, King ye dibirimbom ye arinambo arimbed yi korem kuu yiri bumangkenib God yaningko kankoone ¹²yedmiwen,

“Anam kwanok!

Aningko kankooniyiiib nambiriyiiib meeni kangdomiib eso andiyiiib aningko darewoob arimbed koniyiiib yiminmo dobiriyiiib aromkonoyiiib

kuu nub God yaa kerok, aron korem korem.

Anam kwanok!” andiwen.

¹³Kwaniiwe, aamkono mamaambed ne yaa kaamonoon, “Ebkad kawanmoyiiib inwariwen kee kane awene, yi kuu kunayambed miniwen?” andoon.

¹⁴Kwanandoone, nembad inandaan, “Aamkono, ebkaadee.” andaane yembad yedmoon, “Kekee yi kuu dabab miin arewa menebe yenbandoon aombad miniwen. Kwane, yi ebkad kuu Sibi Mana ye umkanbed oganabe kawanmo kerundoon. ¹⁵Kwanikob,

yi kuu God ye ooni ye dibirimbom ye arinambo arimbed doberenib, amnoomiib awingyawiib ye kurikuri boyambib darewoob aombad ye aningko kankoonembaraiwe,

King ye ooni ye dibirimbom ari dibeem kumbed yi yoom doberene yi yaa awande keendombirimaan.

¹⁶Yi kuu angkon ika mungi bobnaibban, angkon ika ok moom bobnaibban.

Aron nimin kuu yi yaa yaunban kere, niminbed yaune bobnaibban.

¹⁷Amborom kuu Sibi Mana king ye ooni ye dibirimbom ye wedangka doreen kumbed yi yaa sibi ooni ye karub areb kerundaneen kowe, yembad wadkeri ye dem ok menebuun yaa be wananeen.

Kwane, Godbed yi indob yaa yi inok kuu korem aadmendaneen kii.” andoon.

Yesumbed Beegod Yaa At Nunung Dere Dere

Karangkiwen Ed Andi Kuu Daandoon

8 ¹Kwane, yembad at nunung dere dere karangkiwen ed andi kuu daandoone, Ewen ari kuu kuweng aweneyiiibban kereen kuu afenawa kereen.

²Kwanuune, wedmaane God ye murubia arimbed doriib ye engyus ediib kuu kibi ediib ben bangkandoon.

³Engyu mamaa ye kuu gold yabad kobukmoyiiib kandoon kumbed mene dingkan nengke baeb konimbom dia monoon. Ye yaa kuu baeb

amun nengke koni yeman yemoon bangkandoona, God ye karadmodan korem yi kurikuriyiib king ye ooni ye dibirimbon ye arinambo arimbed yeene nengke baeb konimbon goldbed ongmiiwen arimbed nengkoon.

⁴Kwanoone, baeb amun nengkoon ye amarengiib God ye karadmodan yi kurikuriyiib kuu engyu ye dingki yaambed God ye murubia ari daaneboon. ⁵Kwanekore, yabad kuu nanwene dingkan nengke baeb konimbon yaambed amot kuu ben nongkobekore okad yiri nan koraroon. Kwanoone, nambadiib amkuniyiib imakiib dowodki mimoyiib kamoon.

Engyus Ediib Kibi Ediib

⁶Kwamoone, engyus ediibbed kibi ediib awiniwen kuu mongkodkono yaa dedmobenan winiwen, nekwe komki yeman.

⁷Kwane, engyu ibdurukbed ye kibi baandoon. Baandoone, am boyareb yurukmo kuyiib amoyiib umkanbed daboknoon kuu okad yiri kiroboon. Kwane okadiiwa ayiwa kuu nekwe ayoobmimiib kerekore mimo angkara kuyiib kerekore koremiib kuu denoboan.

⁸Kwane, engyu ayoob andimbed ye kibi baandoon. Baandoone, aangko darewoob areb kumundinmo amoyiib kuu karamok yiri kombureen. Kwanoone, karamok kumundin kuu nekwe ayoobmim kerekore mimo angkara kuu koronde umkanmo kereen. ⁹Kwanoone, karamok yiri ye oona dingkana korem kuu nekwe ayoobmimiib kerekore mimo angkara kuu dukniwen. Kwane motod kangkon korem nekwe ayoobmim kerekore mimo angkara kuu monmaroon.

¹⁰Kwane, engyu ayoobmim andimbed ye kibi baandoon. Baandoone, mindong darewoob ambid arimbed angkadkok ye nambiri areb kombere yure kamene ok darewoowiiwa dem okiwa korem kuu nekwe ayoobmim kerekore mimo angkara ari komboroon. ¹¹Mindong yaningko kuu Kook. Kwanoone, kwamune ari komboroon ye ok kuu koronde kookmo kereen. Kwanoone, nimakarub yemoon kuu ok kookiib aniwen kumbed dukniwen.

¹²Kwane, engyu kaning andimbed ye kibi baandoon. Baandoone, aron kuu kande baangke ayoobmim keremoon areb kere mimo angkara kuu kumunmo kereen. Wood kangkon kwamunemo kereen. Mindong kangkon nekwe ayoobmim kerekore mimo angkara kuu kumunmo keruune, amnoomiib awingyawiib kangkon be baangke ayoobmim keremoon areb kere mimo angkara kuu kumunmo kereen.

¹³Kwane, kereknoni wengambaraane on kambeb kuu ambid ambab aombed wan yarebone naawonmo baande yedmoon, “Dabab, dabab, dabab, kuu menebanean kii! Okad yiridan korem kuu dabab darewoob arewa kerandamiib kii. Amborom kuu engyus ayoobmim kuu kibi baandandamiib kii!” andoon.

9 ¹Kwane engyu angko andi ye kibi baandoon. Baandoone, ambid arimbed okad yiri komboroon ye mindong kuu wedmaan. Mindong

yaa kuu dem kongdem yiri awad arewayiib doriib ye ambongko kiiyiib konoon. ²Kwane dem kongdem ambongko kuu daandoone ambib amot denimaun ye amareng darewoob areb deedereboon. Deederebekore, aroniib ambidiib kebendoone miriknoon. ³Kwanoone, amareng kuyaom kumbed ed yemoon kuu menebiwen. Kwane, yi kuu kak ye ambod arewa kwamune areb yi yaa bangkandoon. ⁴Kwane kore yedmendoon, “Okad yiri ye kereeka aya kawa komo komo deederebeen kuu monmaraib, kumban nimakarub kanembed yi kuu binad ari God ye kumuniib derindodan kumbedmo.” andoon. ⁵Yi kuu yeene nongkobi yaromkonoyiib kondindo kuned, domondaniwe kak ye durud yewed areb kande wood angkoyiib yewedmo dobaraniib yaromkonoyiib kondoon. ⁶Kuyaron aom kuu nimakarub kuu bobni kiwaan onmaniib kumban, wedmaibban. Yi kuu yoworande kamaniib kumban bobni kuu yi yaa manaanban. ⁷Ed kuu hoosbed ana nangbi yeman wanande nekwimaib kwane areb keriwen. Yi korok ari kuu od gold ye king korok are dereni yeman areb kuyiib deebiwen, kwane yi murubia kuu karub yi murubia areb. ⁸Yi awung kuu nima yawung areb angkon yi ningkambo kuu laiyan ye ningkambo yidkangiib kwamune areb. ⁹Yi abadkono yaa kuu yeeng barad ye yirim areb deebiwen, kwane yi buraab kuweng kuu hoos yemoonbed seriot bingeben wanaiwe kuyaombed dobere nangbimaib ye kuweng areb. ¹⁰Yi kuu yibikonoyiib kakbed domondekorib ambod arewa kowimaib kwamune areb, kwane yi yibikono anukbed nimakarub kuu yenbandaniib kwane wene wood angkoyiib keraneen ye aromkonoyiib kondoon. ¹¹Yi korok kuu dem kongdem yiri ye awad yaningko Hibu wengbed kuu Abadon, angkon Gurik wengbed kuu Apolion. Aningko kuye weng id kuu monmari ye awad.

¹²Dabab ibduruk meneboon kuu dowan keroon, kumban angkon ari dabab ayooiib menebandameen.

¹³Kwane, engyu kung andi ye kibi baandoon. Kwanoone, wengambaraane God ye murubia ari dingkan nengke baeb konimbon goldbed ongmiwen ye dungkun dungkun kaningiib dobereen kuyaombed wengmo yeedereboon kumbed, ¹⁴engyu kung andi kibiyiib kandoon yaa yedmoon, “Engyus kaningiib ok awaan darewoob Yufretes yaa yengbendiwen kuu dudbere.” andoon. ¹⁵Kwane engyus kaningiib kuu meedme doriib ye aroniib woodiib weewiib ari kereen kowe, nimakarub korem nekwe ayooobmim kerekore mimo angkara kuu yenbande nongkobi dowad dudmungkoon. ¹⁶Kwane hoos ari dibiib ye ana nangmidan korem kuu 2 andered milieniib andoone kwane wengambaraan.

¹⁷Hoosiib hoos ari dibiibdaniib yaa wane wedmaan kuu kekamune, yi yirim kuu amoyidkob dodmo kwamune areb, ambidkadmo, wubmo sulfaa arewiib. Hoos yi korok kuu laiyan yi murubia areb, yi mongkodem aombed amoyiib amarengiib bot sulfaayiib deedereboon. ¹⁸Kwane,

korem nekwe ayoobmim kerekore mimo angkara ye nimakarub korem kuu dabab kondi ye yiribman ayoobmim kee amoyiib amarengiib bot sulfaayiib kumbed hoos yi mongkodem aombed deederebe yenbandoone dukniwen. ¹⁹Hoos yi dabab kondi ye aromkono kuu yi mongkodem aomiib yibikono anukiib kui. Yi yibikono kuu niin areb, yibikono anuk kuu niin yi korok areb kowe kumbed nimakarub yenbande yewed kondimaib.

²⁰Kumban nimakarub dabab keembed yenbande nongkobindodan kuu yi dingkimbed komo amarakmiwen yaa kuu koronde amonombindo. Kwane, yi kuu awad arewa arewa yaayiib, wengambere wedme yarindeban ye dudi god yi kuruwak goldbediib silvaambediib broonsbediib bodbediib atbediib ongmiiwen yaayiib kurikuri kerimaib kuu korondindo. ²¹Kwane, yi kumka kuman kamiyiib waruk komowiib nenem kamenabiayiib yid benabiayiib kuu koronde amonombindo kii.

Engyu Yoom Beegod Bedmiwen Embeng Mana Yoom

10 ¹Kwane wedmaane, engyu maaaa aromkono darewoowiib kuu Ewen arimbed kameneen. Ye yaa kuu wiibbed awanewandoon. Ye korok ari kuu niin ari kuruyiib. Ye murubia kuu aron nambiri areb. Ye yon kuu amoyidkob yumbu areb. ²Ye kuu beegod bedmiwen embeng mana kuu daandoon kumbed ye dingki ari angkeen. Kwane, menene ye yon wiwi angka kuu karamok yiri dore, angkon yon an angka kuu bid ari dore keroon. ³Kwanekore laiyon ye kabang areb naawonmo baandoon. Kwane baandoone nambad ediib kuu dakmenabiwen. ⁴Nambad ediib kuu kwane dakmenabiwe wongkok andaan kumban, wengambaraane Ewen arimbed wengmo yedmoon, “Nambad ediibbed dakmiwen kuu wongkaab, kan bikne.” andoon.

⁵Kwane, engyu karamok yiri dore bid ari dore keroone wedmenaen kumbed ye dingki wiwi kuu Ewen kerekmen yaa kankoonoon.

⁶Kwanekore, ambidiib kwari yeman koremiib, okadiib kwari yeman koremiib, karamokiib kuri yeman koremiib ongmeneboon ye God aron korem korem doreen ye aningko yaambad yedme kowene yedmoon, “Mogeed mogeediibban kii! ⁷Kumban engyu ed andi ye kibi baandandamaneen yaron aom kuu God ye biknimbon weng ye profesidan ye deme awinimaib yaa daandoon kwamunemo keraneen.” andoon.

⁸Kwane, Ewen arimbed wengmo anuk wengambaraan kwane ika ne yaa daawe yedmoon, “Weneneb engyu karamok yiri dore bid ari dore keroon ye dingki ari beegod daandoone angkeen kuu kande.” andoon.

⁹Kwanandoone, weneni engyu yaa beegod embeng bedmiwen kuu kawok ande kaamonenaan. Kaamonenaane, yembed yedmewoon, “Kande ane. Kwananeeb kuu eb mongkodem aom kuu in ok ambod amun areb kwane keraneen kumban, eb kabeyob aom kuu derebmo keraneen.”

andoon. ¹⁰Kwane, engyu ye dingki yaa beegod embeng bedmiweniib kuu kande anaan. Anaan kuu mongkodkono aom kuu in ok ye ambod amun kwane areb, kumban kan yoobnaane ne kabeyob aom kuu derebmo keroon. ¹¹Kwanaane, ne yaa yedmewoon, “Eb kuu angkon ika amyenimbon yemooniib ambibkin yemooniib weng maa maa yemooniib king yemooniib yi dowad profesi weng daande.” andoon.

Yesu Ye Weng Dakmenabidan Ayoob

11 ¹Kwane ne kuu kumunkingki yeman aroob konokab kawekore yedmoon, “Wene God ye kurikuri boyambib darewoowiib dingkan aye nengke God yaa baeb konimbon yaayiib kuu kumunkingke, kuyaa kurikuri kamiibdan kuu kimingke. ²Kumban kurikuri boyambib darewoob ye kuuk yeenbon aom kuu kumunkingkaab, amborom kuu Godiibbandan yaa kondiwen kowe. Yi kuu Karadmo Siti aom awune oonekoriwa yenbande yarebe monmare yarebe kamaniib kuu dabab ware yiminban keraneen kuu wood 42yiib kamaniib. ³Kwane, nembed ne weng dakmenabidan ayoob yaa aromkono kondaniine, ebkad karong deebekorib aronki 1,260yiib God ye profesi weng dakmaniib.

⁴“Karub ayoob kee olif at ayoowiib lem denobimaanbon ayoowiib okad kumundin ye Yariman ye arinambo ari doobereen areb. ⁵Kanembed yi yaa monmarandamaneen kuu yi ayoob yi mongkodkono aombed amot angkaderene yi bondan kuu nengkanabe yenbande dowan keraneen. Karub kanembed yi yaa monmarandamaneen kuu kwamunemo bobnaneen. ⁶Karub ayoob kee profesi weng dakmaniib yaron ari kuu, yi kuu am kebendi yaromkonoyiib, ok yaa yedmaniiwe umkanmo keru yaromkonoyiib, yedmaniiwe bob anikad maa maa korembed yenbande derendari yaromkonoyiib kii. Kwane, yi dowakenmo yaambad kamaniib.

⁷“Kwane, Yesu ye weng dakmenabe dowan keraniib kuu dem kongdem yirimbed demboon ye arud dingkan maa kumbed burudande yenbandaneene duknaniib. ⁸Yi id kuu yirin kamuun ye siti aom kiwaan ari danganiib. Kuye siti ye kumun angkara aningko kuu Sodom areb Idyip areb. Kuyaom kuu yi Yariman kuu at ming ari aye kowiwen. ⁹Kwane, aron ayoobmim dowan kere amkimombed wene aronkob yaa keranuun kuye niindem aom kuu ambibkin mimim korem yaayiib, weng mimim korem yaayiib kad mimim korem yaayiib nimakarub korem kuu keendombere yangmadandekorib yi bob id kuu ben mangkaibban. ¹⁰Kwane okad yiridan kuu yi ayoob dukniwen yaa yoyandekorib orok ane barangbed neman munob konoon konoon kamaniib, amborom kuu profesidan ayoob kembed okad yiridan yaa durud yewed kondimaib kowe.

¹¹“Kumban aron ayoobmim dowan kere amkimombed wene aronkob yaa kuu Godbed wadkeri ye inum kondaneene dembaniib. Dembaniibe

kane kane yi ayoob wedmendidan kuu unimbed yenbandaneen. ¹²Kwane, yi ayoob kuu wengambaraniwe Ewen arimbed weng kuu naawonmo yi yaa baande yedmaneen, ‘Kari yaro minime.’ andaneen. Andaneene yi bondan kuu kwane keendombaraniwe wiib aombed Ewen ari daananiib.

¹³“Daaniwe, erebnarimban kumbed dowodki arewa kamene siti aom kuu ambib korem nekwe angko angko kerekore mimo angkara kuu monmaranuun. Dowodkimbed kadaareb 7,000iib korem yenbandaneen. Kwananeene, wad doriibdan kuu uni miin darewoob kerekorib Ewen ari doreen ye God yaningko kankoonaneen.” andoon.

¹⁴Dabab ayoob andi kuu menebe dowan keroon kumban, angkon dabab ayoobmim andi kuu kirod mananeen.

Kibi Ed Andi

¹⁵Kwane, engyu ed andi ye kibi baandoone Ewen arimbed wengmo naawonmo baande yedmiwen,

“Okad kumundin kiri ye oonimbon kuu, nub Yariman yoom ye Keresu yoom yi oonimbon keroone, aron korem korem yembed oonaneen kii.” andiwen.

¹⁶Andiwe, aamkono aamkono wad kaningiib yi ooni ye dibirimbon arimbed God ye arinambo ari dibiib kuu korok kan kibine God yaningko kankoone ¹⁷yedmiwen,

“Aromkonomo Ye Yariman God, anuk doberewen kibik doreeb ye God,

nub kuu eb yaa eso anduub, amborom kuu eb aromkono darewoob kandekoreb andowe ooneeb kowe.

¹⁸Okad yiridan kuu arud wandiwen kumban, eb norin kuu monoon.

Dukniwendan wengyundandeneb,

eb profesi weng dakmidan eb deme awinimaiwiib eb karadmodaniib ewaningko kankoonimaibdaniib,

eb nimaya karuwa aningko embeng o darewoob kui, yi kuu kakman bangkandeneb,

kane kanembed okad yiri monmariwen kuu monmaraneeb yaron kuu muneen kii!” andiwen.

¹⁹Kwane, God ye kurikuri boyambib darewoob Ewen aom kuu nandoone, kuyaom kuu God ye amob weng ye boks karadmo kuu dianmo keroon. Kuyaambid imakiib amkuniyiib nambadiib dowodki mimoyiib, nuuwa am yurukmo anam boyarewiib kamoan.

Wonong Yoom Arud Yi Yoom

12 ¹Kwane, Ewen aombed dud korokbi yeka mamaa darewoob angkadoroon kuu kei, wonong mamaa, yu yaa kuu aron nambirimbed ebkad areb awanewandoon kumbed, yu yon dabderem yiri

kuu woodiib, angkon yu korok ari kuu king ye korok ari dereni yeman kuyaambed mindong wad ayoowiib kuu dereneen. ²Yu kuu oyoomiib kowe, dana woonandamenu yewed bobne kabangangkaun.

³Kwane, angkon dud korokbi yeka maaaa Ewen aombesd angkadoroon kuu kei, arud ye yi dodmo miin kedbon kai, ye kuu korok ediib durub angko angkoyiib, kwane ye korok korok ari kuu king ye korok ari dereni yeman kwamune areb ediib dangoon. ⁴Kwane, mindong ambid aom korem kuu nekwe ayoobmimiib kerekore mimo angkara kuu ye yibikonombesd daadmene okad yiri kiraroon. Kwane, ye kuu dana woonandamuun ye wonong yu arinambo ari dana woonanuune erebnariyiibban kwane aye ani ye dowad daboroon. ⁵Kwane, yumbesd karub dana wooneen, ye kuu king ye aromkono yobdoodmo kwamune areb ambibkindan korem yaa oonaneen. Kwane, yu dana kuu kirodmo dabangkere God ye king ye ooni ye dibirimbon ari dibeeniib ari nen daanoon. ⁶Kwanoone, wonong kuu Godbesd amboon angka nekwoon yaa kombiri wenenu, kuyaambesd aronki 1,260yiib yu yaa oonaneen ye dowad wuneen.

⁷Kwanuune, Ewen aom kuu Maiko ye engyus yoom miniiwe arud ye yi ye awad yoom nangbiwen. ⁸Kumban arud ye yi yaromkono kuu yiminban kowe, yi yumbon Ewen ari kuu domondiwen, ika winindeban keriwon. ⁹Arud ye yi kedbon kuu unyeman ye niin, awad arewa Seten kui, okad yiridan kumundin birande ben kiwaan abdon wini ye karub kui, ye kuu ye awadiib okad yiri benkiraroon.

¹⁰Kwanoone, wengambaraane Ewen arimbesd wengmo naawon baande yedmoon,

“Kibik kened kuu bobni yaa burudande bindiyiib aromkonoyiib
oonimboniib Godbesd ongmenaboosd kuyiib
Keresu ye kwanime andi yaromkonoyiib meneboon.
Amborom kuu anam andiwendan yaningko monmarande kami ye
karub
nub God ye arinambo ari amnoomiib awingyawiib yi aningko
monmarande kamembirimaan kuu
okad yiri kankoraron kowe.

¹¹Yi kuu Sibi Mana ye umkaniib weng anam dianmo dakmiweniib
kumbesd
Seten burudanduniwen.

Kwane, bobni ye dabab yi yaa meneboon kuu
yika yi anam andi koronde yi wadkeri kuu ma amuknindo.

¹²Kwanekob, Eweniib kuyaom doriibdaniib kuu kubime!
Kumban okadiib karamokiib kuu dabab kandaniib,
amborom kuu awad arewa kuu kuyaa kamonoosd kowe.
Ye aron kuu dukmen kere dia kereen kuu yekaad kowe,

norin darewoob wandoon.” andoon.

¹³Kwane, arud ye yi kuu wedmoonka ye kuu okad yiri kan koraroon kowe, karub dana wooneen ye wonong kuu wande keendenmo wonoon. ¹⁴Kwanoone, wonong kuu on diba darewoob ye buraab ayoob bangkandoone yu dowad nekwoon ye amboon yaa wanwuneen. Kwane wene kuyaambed doburuked arud ye yi awinendokban kerok ande oonoked, weeb ayoobmim ari weeb angkarayiib dowan keru yeman. ¹⁵Kwane, arud ye yi kuu ye mongkodkono aombed ok onduknoone urok kereen. Kwanoon kuu wonong burudande okbed weene kanwunuk anded. ¹⁶Kumban wonong kuu okadbed awandeen. Arud ye yimbed ok onduknoon kuu okad kuu mongkod daande ok kuu kanyoobneen. ¹⁷Kwanuune, arud ye yi kuu wonong yaa arud darewoob kai wandundekore, wene yu awoya Godbed kwamime andoon ye weng yaa anam andenib Yesumbed komo kamoon ye weng awiniwendan yaa nangbok wonoon.

¹⁸Kwane, arud ye yi kuu karamok kubuk ari doroon.

Arud Dingkan Karamok Yirimbed Demboon

13 ¹Kwane, wedmaane, arud dingkan maa kuu karamok niindem yirimbed demboon. Ye korok kuu ediiib, kwane ye durub kuu angko angkoyiib. Kuyaambed king ye dereni yeman kwamune areb kuu angko angkoyiib durub ari dangoon. Kwane, ye korok mimim ari kuu God yaningko dangoon kumbed God yaa damangkanoon. ²Arud dingkan kuu dura anon maa leopaad kwamune areb wedmenaana. Kumban ye yon kuu bea ye yon areb, kwane ye mongkodkono kuu laiyan ye mongkodkono areb. Arud ye yimbed arud dingkan yaa yaromkonoyiib ye ooni ye yumboniib deme aromkono darewoowiib bangkanoon. ³Arud dingkan ye korok maaaa ari kuu kuman ayiiwe bobnemoon areb keroon, kumban bobnoon ye bob kuu ongmoone wadkeron. Okad yiridan korem kuu binangkekorib, arud dingkan ye yoman winiwen. ⁴Kwane, nimakarub kuu arud ye yi yaa kurikuri kere yaningko kankoonimaib, amborom kuu yembed arud dingkan yaa deme aromkono konoon kowe, angkon arud dingkan yaa kangkon kurikuri kere yaningko kankoonenib yedmimaib, “Kanembed arud dingkan areb? Dowan! Kanembed ye yaa nangbaneen? Yiminban ee!” andimaib.

⁵Arud dingkan kuu kerengkan wengiiwa God yaningko monmari ye wengiiwa ye dakmi yaromkonoyiib korok keru yaromkonoyiib bangkanoon kuu wood 42yiib keru yeman. ⁶Kwane, ye mongkod daandene God yaningkoyiib ye oonimbon Ewen yaningkoyiib kuyaom doriibdan yi aningkoyiib kuu monmaroon. ⁷Arud dingkan yaa kuu God ye karadmodan yaa nangbene burudandi yeman yaromkonoyiib konoon. Kwane, ye yaa kuu amyenimbon mimim koremdaniib weng mimim

koremdaniib ambibkin mimim koremdaniib kad mimim koremdaniib yi korok keri yaromkono konoon. ⁸Okad yiridan korem kuu ye yaa kurikuri kere yaningko kankoonaniib, kukuu aye kowiwen ye Sibi Mana ye wadkeri buk aombed kumkam korem ongmenaboos yaron yirimbed aningko wongkindodan kui. ⁹Kanembed kerendemiib keroka, wengamborok.

¹⁰ Kane wii aom kaani dowad kinoon kuu,
kwane wii aom kaananiib.

Kane kerewangbed ayi dowad kinoon kuu,
kwane kerewangbed ayaniib.

Keye weng kumbed God ye karadmodan kuu yodbiriban iwarimo kangdommo doberenib anam andi yaa ma korondiyiibban doberembirime.

Arud Dingkan Okad Yirimbed Demboon

¹¹ Kwane, wedmaane, arud dingkan maa okad yirimbed demboon. Ye kuu sibi mana areb durub ayoob, kumban ye kuu arud ye yi ye weng areb dakmimaan. ¹² Kwane, ye yaa kuu arud dingkan ibdurukbed ye deme aromkono konoon kumbed arud dingkan ibduruk ye dowad deme korem kuu kwane ambangkoon. Kwane, yembed okad kwari doriibdan korem kuu naawon dedmonoone, kuman ayiwe bobnoon kumban ongmenoone wadkeroon ye arud dingkan ibduruk kuyaa kurikuri kere yaningko kankooniwen. ¹³ Kwane, okad yirimbed demboon ye arud dingkan kembed dud kedmengki yeka mamaa darewoob ongmenaboos. Kwangkan kuyiib kuu nimakarub yi arinambo arimbed ambid arimbed amot yedmoone okad yiri kubudoroon. ¹⁴ Arud dingkan ibduruk ye aromkono konoone ye dowad dud kedmengkoon kembed okad yiridan birondoos. Kwane, yembed arud dingkan ibduruk ari kerewangbed ayiwe bobnoon kumban ika demboon ye kuruwak kuu botbed ongmime andoone ongmiiwen, yaningko darewoob ari koni dowad. ¹⁵ Kwane, ye yaa kuu arud dingkan ibduruk ari ye kuruwak ongmiiwen kuyaa inum koni yeman yaromkono konoone kwanoos. Kwanoos kuu weng dakmoked kanembed kuruwak yaa “Nub God kii!” andaibban kuu yenbande nongkobi yeman. ¹⁶ Ye kangkon nimakarub korem, aningko embengiib o darewoowiib, yiribman yemoondaniib o kamboknondaniib, yena yi dabderem yiri dobere no deme awinembiridaniib o yika oonimaibdaniib kuu yembed yi dingki wiwi angka o binad ari kumun bi yeman ande dedmobendoone kwaniwen. ¹⁷ Kowe, karub kanembed kumuniibban kuu berengke moonaanban. Kuye kumun kuu arud dingkan yaningko o ye namba kui.

¹⁸ Weng kee inamen kangdom meeni yeman. Kanembed inameniib keroka, arud dingkan ye namba kuu andangkok, kukuu karub ye namba. Ye namba kuu 666 kui.

Sibi Mana Yoom Ye Nimakarub 144,000iib Yoom

14 ¹Kedi, wedmaanka, Sibi Mana kuu aangko Saiyon ari doreen. Kuyaa kuu nimakarub 144,000iib yi binad ari ye aningkoyiib Awodki yaningkoyiib wongkanaboondan kumbed ye yoom doriib. ²Kwane, wengambaraane, kuweng Ewen aombed okbenbon kuweng arewiib nambad kuweng arewiib kamoon. Kuye kuweng wengambaraan kuu haap wangkidanbed yi haap wangkemoon areb kamiwen. ³Kwane, karub ku doriib kumbed God ye ooni ye dibirimbon ari dibeeniib wad doriib ye dingkan kaningiib aamkono aamkonoyiib yi arinambo arimbed yook yeeb wingkiwen. Yook kuu karub maa kanembed ma kwamune kaadkere wingkindeban. Yeka okad yirimbed biddoondan 144,000iib, yi kumbedmo yikaad. ⁴Kekee, yi kuu nima yoom ma dangindodan, nima yaa ma ambarakmindu. Yi kuu Sibi Mana kunaya winimaan kuu yiyiib yoman winimaib. Yob ibduruk wandimaib kuu be God yaa bangkanimaib kwamune areb kuu yi kuu nimakarub aombed biddekore God yoom Sibi Mana yoom yaa yidin be bangkandoon. ⁵Yi kuu dudimokban, kwane karub yenambad yi yaa kuu ambarakmiwen kii ande kadwondimokbandan.

Engyus Ayoobmim

⁶Kwane, wedmaane ambid ambab aombed engyu mamaa kuu aron korem korem ye weng amun okad yiri doriibdan yaa wanwene dakmok wonoon, ambibkin mimim koremdan yaayiib amyenimbon mimim koremdan yaayiib weng mimim koremdan yaayiib kad mimim koremdan yaayiib kui. ⁷Kwane, yembed naawonmo baande yedmoon, “God yaa unekorib yaningko kankoonime, amborom kuu ye wengyundi yaron kuu muneen kowe. Ambidiib okadiib karamokiib dem okiib ongmenaboon ye God yaa bumangke yaningko kankoonime.” andoon.

⁸Kwanoone, engyu mamaa kuu ye yoman menene yedmoon, “Monmaroone kombureen kii! Aningko miin darewoob ye siti Babilon kuu monmaroone kombureen kii. Kukuu ambibkin koremdan yaa nenem ye inamen dowaken arewa kenambun bangkandimaun ye ok arewa bangkandimaun ye siti kui.” andoon.

⁹Engyu ayoobmim andi kuu yi yoman wenene naawonmo baande yedmoon, “Kanembed arud dingkan yaayiib ye kuruwak yaayiib bumangke yaningko kankoonene ye binad ari o dingki yaa arud dingkan ye kumuniib kandaneen kuu, ¹⁰God ye arud miin darewoob ye ok arewa kangkon kande ananeen. Ok kee Godbed ye norin ye kabus aom bunoon, ok maayiib kuyaom dabokne bunindo, aromkono kumundinmo bunoon. Kwane, kuye karub kuu Sibi Mana yoom karadmo ye engyus yoom yi arinambo arimbed bot sulfaa deneen kumbed durud yewed

konimamaneen. ¹¹Kwananeene, yi durud yewed kandembirimbon ye amareng kuu aron korem korem kwane deederebembaraneen. Kane kanembed arud dingkan yaayiib ye kuruwak yaayiib bumangke yaningko kankoonaniib o arud dingkan yaningko ye kumun kandaniib kuu, awingyawiib amnoomiib ma yiidkaibban durud yewedmo kandembaraniib.” andoon. ¹²Kowe God ye karadmodan, kwamime andi ye weng Godbed yedme kowoon kuu awinenib Yesu yaa ma korondiyiibban doberembirimaibdan kuu keye weng kumbed aromne yodbirimban iwarimo kangdommo doberembirime.

¹³Kwane, wengambaraane Ewen aombed wengmo yedmoon, “Weng kee wongke. Kibikbed ari kee Yariman Yesu ye yoman wananiib kumbed duknaniibdan kuu Godbed amun kerundaneen.” andoon.

Kwanandoone, Kingkinbed yedmoon, “Eyokee, yi deme yobdood ambangkiwen ye dowad kumbed dibere yiidkaniib, amborom kuu komo komo ambangkiwen kuu dian keraneen kowe.” andoon.

Okad Wandu Yeman

¹⁴Kedi, wiib kawanmo wedmaan. Wiib kwari dibeen kuu okad yiri ye karub areb. Ye korok ari kuu king ye dereni yeman goldbed ongmiwen kuyiib derenoon. Ye dingki yaa kuu wiit yob wandi ye karang doboob arudiib awinon. ¹⁵Kwane, engyu mamaa kuu kurikuri boyambib darewoob aombed yaro menene wiib ari dibeen ye karub yaa naawonmo baande yedmoon, “Yob okad yiri kuu yumuneene wandi yaron kereen kowe, eb karang nande wande.” andoon. ¹⁶Kwanandoone, wiib ari dibeen ye karub kumbed karang nande okad kumundin ye yob kuu wandoon.

¹⁷Kwanoone, engyu mamaa kurikuri boyambib darewoob Ewen aombed yaro monoon, ye kangkon wiit yob wandi ye karang doboob arudiib awinon. ¹⁸Angkon engyu mamaa dingkan nengke baeb konimbon ye amot oonimaan kuu baeb konimbon kuyaambad angkadere menene karangiib awinon ye engyu yaa naawonmo baande yedmoon, “Nong yob mimyamo demboon korem okad yiri kuu yumunoon kowe, eb karang nande wande.” andoon. ¹⁹Kwane, ye karang nande okad kumundin ye nong yob kuu wadme bene God ye arud miin darewoob ye yob beengkimbom yirimo ben kiradmoon. ²⁰Yi kuu siti angkara nong yob beengkimbom aombed beenganaboon. Kwanoone, umkan kuu deederebene urok areb kere derebe daanoon kuu, daane hoos ye kongkono yimin yaa keroone angkon bune yaron ye ambab kuu 300 kilomita keroon.

Yeenbon Dabab Kondi Yeman Nekwiwen

15 ¹Kwane, Ewen aom wedmaane, dud korokbi yeka mamaa darewoob kamoan. Kuyaambad engyus ediib kuu yeenbon

dabab kondi yeman ediib awingkiwen. Kuyaa kumbed God ye norin kuu yeenbon yimin wandi yeman.

²Kwane, wedmaane karamok dabonmo ok kuruwak areb amoyiib daboknoon kumbed karamok kebed yaa nimakarub yena doriib. Yi kuu arud dingkaniib ye kumuniib yaningko ye nambayiib bindo burudandiwendan kui. Yi kuu Godbed anukbed wingki yeman haawiib bangkandoon kumbed awinenib, ³God ye deme karub Moses ye yookiib Sibi Mana ye yookiib wingkiwen,

“Aromkono Korem ye Yariman God,
ebbed kami kuu arimbed darewoob yeka maaaa yeman kii.
Ambibkin Korem ye King,
ebbed ambangkimaab kuu yorokmo anammo kii.

⁴O Yariman, kanembed eb yaa unene ewaningko kankoonaanban?
Kedi, ebbemo kuu karadmo kii.

Ambibkin koremdan kuu mene eb arinambo ari bumangke
ewaningko kankoonaniib,
amborom kuu ebbed kami yorokmo kuu dian keroon kowe.” ande
wingkiwen.

⁵Kwaniwe, wedmaane Ewen ye kurikuri boyambib darewoob kuu nandoon. Kuuu kurin anukbed Godbed komo korokboone wedmiwen ye kurikuri parai kombon kui. ⁶Kuyaombed engyus ediib kuu dabab kondi yeman ediib ben angkadiriwen. Yi kuu ebkad doboob koroomiibban nambirimo kumbed deebiwen. Kwane yi abadkono yaa idkono nong goldbed ongmiwen kumbed awanewandoon. ⁷Wad doriib ye dingkan kaningiib yaa mamaambed gold meneki wongdem ediib kuu engyus ediib yaa bangkandoon. Meneki wongdem aom kuu aron korem korem doreen ye God ye arud miin darewoowiib demboon. ⁸Kwanoone, kurikuri boyambib darewoob kuu God ye nambiriyiib ye aromkonoyiib ye amareng kumbed kebenoon. Kwanoon kowe, kurikuri boyambib darewoob kuyaom kuu karub maa awunindeban kwane wene ari engyus ediib dabab kondi yeman ediib kuu kwane ondukderebe dowan keriwed.

God Ye Arud Miin Darewoob Meneki Wongdem Ediib Aom

16 ¹Kwane, wengambaraane kurikuri boyambib darewoob aombed engyus ediib yaa wengmo naawonmo baande yedmoon, “Winime, God ye arud miin darewoob meneki wongdem aom ediib kuu okad yiri ben ondukderebime.” andoon.

²Kwanandoone, engyu ibduruk andi kuu wene ye meneki wongdem kuu okad yiri nan onduknoon. Kwanoone, nimaya karuwa arud dingkan ye kumun yi binad o dingki yaa kandekorib ye kuruwak ongmiwen yaa bumangke yaningko kankoonimaibdan kuu, yin ye bobob yewed darewoob kandiwen.

³Kwane, engyu ayoob andi ye meneki wongdem kuu karamok yiri nan onduknoon. Kwanoone, karamok kuu koronde umkan bobwum areb keruune karamok yiri doriib ye dingkan korem kuu dukniwen.

⁴Kwane, engyu ayoobmim andi ye meneki wongdem kuu ok yiriyiib demok yiriyiib yaa ondukdereboone koronde umkan kereen. ⁵Kwane, wengambaraane engyu ok yaa oonoon kumbed yedmoon,

“Eb kuu Karadmo Ye God anuk doberewen kibik doreeb,
ebbed kwamunemo wengyundeneb dabab kee bangkandewen kuu inamen yorokmo,

⁶ amborom kuu yimbed eb karadmodaniib eb profesi weng wengambere dakmidaniib kuu yenbandiwe yi umkan kubudoroon kowe,
ebbed kwaniwen ye kakman umkan kondeneb anime andewen.”
andoon.

⁷Kwane, wengambaraane dingkan nengke baeb konimbon yaambad wengmo yedmoon,

“Ee, Aromkonomo Ye Yariman God,
eb wengyundewen kuu yorokmo anammo kii.” andoon.

⁸Kwane, engyu kaning andi ye meneki wongdem kuu aron ari nan onduknoon. Kwane, aron kuu aromkono kondoone nimakarub yaa yu amotbed nengkuune dene kubungniwen. ⁹Yi kuu nimin darewoob kumbed denoniib kowe God yaningko yaa butun kamiwen. Dabab kondoon kuu yembed oonoon kumban, yi kuu nub amarakmi yaa koronde ye yaa amonombe yaningko kankoonaubban andi ye inamenmo awiniwen.

¹⁰Kwane, engyu angko andi ye meneki wongdem kuu arud dingkan ye ooni ye dibirimbon ari onduknoon. Kwanoone, arud dingkan ye oonimbon kuu kumunmo keroon. Nimaya karuwa kuu yewed bobnekorib yi ong domone bungenib, ¹¹bob durud yewedbed yiminban keroon kowe, Ewen ari ye God yaningko yaa butun kamiwen, kumban yi kuu komo amarakmuwen yaa koronde amonombaubban andi ye inamenmo awiniwen.

¹²Kwane, engyu kung andi ye meneki wongdem kuu ok darewoob Yufretes ari onduknoon. Kwanoone, ok kuu dowan keruune, aron dembimaun angka doriibdan yi king mananiib ye kiwaan ongmeen.

¹³Kwane, wedmaane awad arewa ayoobmim koyabdad areb wedmaan. Yi kuu arud ye yi ye mongkodkono aomiib arud dingkan ye mongkodkono aomiib dudi profesiman ye mongkodkono aomiib kuyaumbed dembiwen.

¹⁴Yi kuu dud yeka mamaa kedmengki ye awad arewa, yi kuu okad kumundin aom yarebenib king ben mimyamo kere Aromkonomo Ye God yaron arimbed darewoob keruked nangbi yeman ye dowad yarebimaib.

¹⁵⁻¹⁶Kwane, yimbed king korem ben Hibru wengbed Aamagedon andimaib kuyaamo nongkobiwen.

Kwane, Yesumbed yedmoon, “Kedi, ne kuu yid ye karub areb mananiin, komo aron arimbed mananiin kuu yibkaadban kii! Kanembed ye kuu unik angkemoon arebbaan kerene ye ebkadiib doreen ye karub kuu amun kerunaneen, ye id yaa kebeni yemaniibban kere nimakarub yi murubia ari idmo wenene karak bobnaanban kowe.” andoon.

¹⁷Kwane, engyu ed andi ye meneki wongdem kuu ambid wedya onduknoon. Kwanoone, kurikuri boyambib darewoob aombed King ye ooni ye dibirimbun yaambad wengmo menebene naawon yedmoon, “Kukuu dowan keroon kii!” andoon. ¹⁸Kwane kuyaambad imakiib nambadiib amkuniyib dowodki miin arewayiib kamoona. Dowodki kuu nimakarub anuk doboriwen yaron kuu dowodki miin arewa ma kwane kamoone wedmindoo. Kekee dowodki miin arewa mamaa anam. ¹⁹Kwanoone, aningko arimbed darewoob ye siti kuu bangkanabe ayoobmim kereen, kwane ambibkin mimim yi siti kangkon monmare kirobeen. Kwanuune, Godbed aningko arimbed darewoob ye siti Babilon yu inamen arewa yaa ika meenekore, ye arud miin darewoob ye ok arewa kabus aombed demboon kuu yu yaa kondooone aneen. ²⁰Kwane, dudbi korem angkanabe kirokmoniiwe aangko kuu ma wedmindoo. ²¹Kwane, ambid arimbed am boyareb yurukmo darewoob, yi mimim ye dabab kuu 40 kilo areb, nimakarub ari kiroboon. Kuye durud yewed ye dowad kumbed God yaa butun kameniwen, amborom kuu durud yewed kuu miin arewa kowe.

Wonong Yaningko Babilon Kuu Arud Dingkan Dodmo Ye Animari Dibun

17 ¹Kwane, meneki wongdem awiniwen ye engyus ediib yaa mamaambad mene ne yaa yedmoon, “Menebko, nenem awaan wonong kuu ok awaan yemoon dia dibun kuu ukum kondandameen kowe korokbebda. ²Kedi, yu yoom kuu okad yiri yi kingbed nenem kame ambarakmendimaib, kwane yu nenem kame ambarakmi ye ok arewa kuu kakumundin kuu anekorib awarak yimaun.” andoon.

³Kwane, Kingkinbed ibnewoone engyumbad amboon angka nenwonoon. Kuyaambad wedmaane, wonong kuu arud dingkan dodmo dangkorong ye animarimbed dibun. Arud dingkan ye id kumundin yaa kuu God yanginko monmari yeman ye aningko yemooniib dangoon. Ye kuu korok ediib durub angko angkoyiib. ⁴Wonong kuu ebkad minodminodiib dodmo dangkorongiib inwarekoru, bot goldiib od darewoob ye bot maa maayiib bot kawanmo yanginko peeliib inwareen kumbed yu yaa menengmenengmo keroon. Yu dingki aom kuu gold kabusiib awineen. Kabus aom kuu komyeng ye inamen miin arewayiib nenem kami ye ambod arewayiib kumbed demboon. ⁵Yu binad ari kuu weng id angkara biknoon ye aningko kekane wongkiwen,

BABILON ANINGKO ARIMBED DAREWOOWIIB,
KIWAAN ARI NIMA KOREM YE AWAAN,

OKAD YIRI KOMYENG YE INAMEN MIIN AREWA YE AWAAN, kui.

⁶Kwane, wedmaane wonong kuu God ye karadmo ye nimaya karuwa, Yesu ye weng dakme korokbendiwendan kui, yi umkan anuune awarak ween.

Kwane wedmendekori binangki darewoob keraan. ⁷Kwanaane, engyumbed ne yaa yedmoon, “Eb komande binangkewen? Nembed wonong yu weng id angkara biknooniwa arud dingkan korok ediib durub angko angkoyiib kwarimbed dibere yarimaun ye weng id angkara biknooniib kuu kedmengkabda. ⁸Kedi, arud dingkan wedmenewen kuu anak doboroon kumbed kibikee dorokban, ye kuu dem kongdem yirimbed dembe yarene ye monmari ye yumbon yaa wananeen. Okad yiri doriibdan kuu yimin yiri andowene okad awene ongmenaboos yaronbed wadkeri ye buk aom yi aningkoyiib wongkindo keraneen kuu arud dingkan wedmenekorib binangkaniib, amborom kuu anak doboroon kumbed kibikee dorokban, kuned angkon mananeen kowe.

⁹“Weng kee meeni kangdom yeman. Korok ediib ye id kuu aango ediib, kwarimbed wonong kuu dibuun. ¹⁰Korok ediib ye id mamas kuu king ediib kui. King angkoyiib kuu dukniwen, mim kuu doreen, angkon mim kuu mokaid yaro mananeen. Mananeen kumban aron doboob oonembaranban. ¹¹Arud dingkan anak doboroon kumbed kibik dorokban keroon kuu ika king keroon kowe ye kuu king kaning kaning andimaib. Ye kuu king ediib kuye maa. Ye kuu ye monmari ye yumbon yaa wananeen.

¹²“Durub angko angkoyiib wedmewen kuu king angko angkoyiib, yi kuu oonimbon kandindo, kumban yi kuu korok kere ooni ye aromkono kandenib arud dingkan yoom aron dukmen manambed oonaniib. ¹³Kwane, yi kuu inamen mimo kerekorib, arud dingkan yaa yi aromkonoyiib yi ooni yaromkonoyiib kuu bangkananiib. ¹⁴Kwane, yi kuu Sibi Mana yaa nangbenaniib kumban, yembed burudandaneen, amborom kuu ye kuu yariman korem ye Yariman, king korem ye King, angkon yembed baande kinoondan ma korondiyiibban ye yoman winiwen kuu ye yoom miniwen kowe.” andoon.

¹⁵Kwane, engyumbed ne yaa ika yedmoon, “Wedmaawe nenem wonong kuu dia dibirimaun kuye ok kuye id kuu, kad maa maadaniib kadaareb dareb mimimdaniib ambibkin mimimdaniib weng mimimdaniib kui. ¹⁶Arud dingkan yoom durub angko angkoyiib yoom wedmewen kuu yimbed nenem wonong yaa arud darewoob wandembaraniib. Kwane, wenbande yu barang korem kuu monmare benkiradmaniiwa idmo keranuune, yu yom anekorib amotbed nengkaniib. ¹⁷Kedi, Godbed yi inamen yaa kowoon kuu yembed meenoon

ye dowaken yaambéd ibmo ambangkime anded, arud dingkan yaa aromkono koniwen kuu oonod, God ye weng yaa kuu anam id keraneen.
 18 Wonong ku wedmendewen kuu siti aningko arimbed darewoob.
 Yumbed okad yiri ye king kuu ooneen kui.” andoon.

Babilon Kuu Monmaraneene Kombaranuun

- 18** ¹Kwanoone wedmaane, engyu maa kuu Ewen arimbed kamoon. Ye kuu aromkono darewoowiib kandoon, ye nambiri kumbed okad yiri kawuroon. ²Kwane, aromkono darewoowiib kumbed baande yedmoon,
- “Monmaroone kombureen kii! Aningko miin darewoob ye siti Babilon kuu monmaroone kombureen kii.
 Yu kuu awad arewa yi dobirimbon kereen.
 Kuyaom kuu kingkin arewa mimim korem yoom
 komyeng areb keruwen ye ayari on arewa korem yoom yimbirimo kumbed doriib.
- ³ Amborom kuu ambibkin koremdan kuu yumbed nenem ye inamen dowaken arewa kenambun bangkandimaun ye ok arewa aniwe, okad yiridan yi king kuu yu yoom nenem kamendiwe, berengkidan kuu yu id yu dowaken meeni darewoob kereen kuyaambéd od dareb dareb biwen kowe.” andoon.
- ⁴Kwane, wengambaraane angkon wengmo Ewen arimbed yedmoon,
 “Ne karuwa nimaya, yuyiib yaa kuyaom doriib kuu koronde angkadirime.
 Kwananiib kuu yu ambarakmi yaa daboknokban kerenib,
 dabab miin arewa banuun kuu yiiwiib ma bokban keraniib.
- ⁵ Amborom kuu yu ambarakmi ben numberenmo daaneen kuu ambid ari keroon,
 kwanuune God kuu yu ambarakmi yaa kuu meenoon,
 nonondandindo kowe.
- ⁶ Yumbed yiiib yaa komoyiib bangkandimaun kuu angkon ika kwamunemo ingkandime.
 Yumbed komo kamenabeen ye dowad ingkande ayoob kerime.
 Yumbed dabab bangkandi ye ok arewa bangkandimaun ye kabus kuu kande ok kwamune yu yaa ingkande ayoob kerime.
- ⁷ Yukareb nambiri kandenu yu id yu dowaken yaambéd yiribman yewudmo been kuu,
 kumunkingke durud yewediib mimyob wandembiri yemaniib ibmo kere kondime.
 Yukareb kerengkan kerenu
 ‘Ne kuu kuin keraan, wonong iribban kowe,
 mimyob wandainban.’ andimaun.

⁸ Kwanekob, aron mimo arimbed dabab miin arewambed weene koraraneen,
 bobniyiib mimyob wandiyiib mungi bobnembiriyiib kui.
 Yu kuu amotbed nengke korem denanuun,
 amborom kuu yu yaa wengyundaneen ye Yariman God kuu aromkono ariyiib kowe.

⁹“Kwane, okad yiridan yi king yu yoom nenem kamenib, yu id ye dowaken yaambad komo kamimaun kuu dabokne kwane kamimaibdan kuu, amotbed yu nengke denuun ye amareng wedmendekorib mimyob wande ameng kamendaniib. ¹⁰Kwane, yu durud yewed kuyaa wedmende uni miin darewoob kerekorib, ambab angkambad dobere ameng kamende yedmaniib,

‘Dabab, dabab, kuu meneboon kii!

O Babilon, o siti aningko darewoob ariyiib, aromkono ari ye siti!

Aron dukmen kumbad wengyundi ye dabab kuu ub yaa korem meneboon kii!’ andaniib.

¹¹“Kwane, okad yiri yiribman berengkidan kuu yu yaa mimyob wande ameng kamaniib, amborom kuu keye aron ari kuu karub kanembad yi yiribman yaa ma berengkaanban kowe. ¹²Yi yiribman kuu bot goldiib bot silvaayiib od darewoob ye bot amun yeka mamaayiib bot kawanmo yeka maaaa yaningko peeliib dabua miin amuniib minodminod ye dabuayiib od darewoob ye dabua yaningko silkiib dodmo dangkorong ye dabuayiib baeb amun yeman ye at maa maayiib awon elefant ye ningkambo darewoob yaningko aiforimbed ongmiwen ye yiribmaniib od darewoob ye at maa maambad ongmiwen ye yiribmaniib broonsbed ongmiwen ye yiribmaniib yeengbed ongmiwen ye yiribmaniib bot maaborombad ongmiwen ye yiribmaniib ¹³animan ari bokni yeman sinamoniib animan ari bokni yeman maa maayiib baeb amun nengke koni yemaniib baeb amun yeman meeryiib ferengkinsensiib ok wainiib olif ambodiib flawa amuniib wiit amuniib buromakauyiib sibiayiib hoosiib dibiriwad yiribman benwini yeman waigoniib dabderem yiri dobere no deme awinembiridaniib nimakaruwiib kuu ma berengkaibban kui. ¹⁴Kwane, berengkidan kumbad yedmaniib, ‘Yiribman amun yaa ub dowaken darewoob kerewen kuu ub yaa dowan keroon. Ub yiribman yemooniib kumkam miin manimanandewiib kuu korem dowan keroon, angkon ika kwamune ma wedmaabban.’ andaniib.

¹⁵“Kwane, yu yaa yiribman kee berengke od darewoob bimaibdan kee ambab angkambad doberenib yu durud yewed kandeem yaa wedme uni miin darewoob kerekorib mimyob wande ameng kamenib ¹⁶yedmaniib,

‘Dabab, dabab, kuu meneboon kii!

O siti aningko arimbed darewoob, ebkad amuniib ebkad minodminodiib ebkad dodmo dangkorongiib

bot gold menengmenengiib od darewoob ye bot maa maa
menengmenengiib bot peel menengmenengiib kumbed
inwarewen kii.

17 Kumban aron dukmen kumbed biamod miin darewoob korem kee
monmaroon kii!’ andaniib.

“Kwane, karamok ari ye motod awindimaibdan koremiib motodbed
dewenebimaibdan koremiib motod aom demedan koremiib karamok
angkambed od deme awinimaibdan koremiib kuu ambab angkambed
doberenib, ¹⁸yu denuun ye amot amareng wedmendekorib yedmaniib,
‘Siti aningko arimbed darewoob kee, siti maaaa kuu ma yu arewiib
kerindo kii!’ andaniib. ¹⁹Kwane, mimyob wandiwen dowad ingkud yi
korok ari ben nongkobenib yuude ameng kamenib yedmaniib,

‘Dabab, dabab, kuu meneboon kii!

O siti aningko arimbed darewoob,

karamok ari motodiibdan kuu ub biamod yaambbed od darewoob
kandiwen kii.

Kumban aron dukmen kumbed ub kuu monmaroon kii!’ andaniib.

²⁰ O Ewen ari doriibdan, yiib kuu yu monmari dowad kubime!

God ye karadmodaniib God ye apasodaniib God ye profesi weng
wengambere dakmidaniib, yiib kubime!

Amborom kuu yumbbed yiib yaa komarewa ambangkimaun kuu
Godbed wedme wengyundandoon kowe.” andoon.

²¹ Kwane, aromkono darewoob ye engyu maambbed bot dumnad darewoob
dabawiib kuu kande karamok yiri naawonmo korarene yedmoon,

“Kwamune areb kuu siti aningko arimbed darewoob Babilon kuu yiri
naawonmo kankoraraneene, angkon ika ma wedmaibban.

²² Ub kuyaom kuu haap wangkidaniib yook wingkidaniib yurin
wudmidaniib kibi komke baandidaniib yi kuweng kuu angkon ika
ma kwamune wengambaraibban.

Ub kuyaom kuu deme mimim ambangkidan kuu yenambbed angkon
ika ma wedmaibban.

Ub kuyaom kuu bot darewoob wiit beengkaane flawa kerimaan ye
kuweng kuu angkon ika ma wengambaraanban.

²³ Ub kuyaom kuu lem ye nambiri kuu angkon ika ma yuraanban.

Ub kuyaom kuu wonong yeeb awani ye orokbon ye kuweng kuu
angkon ika ma wengambaraibban.

Anukbed ub berengkidan kuu okad yiri aningko arimbed darewoob
keriwe,

ub waruk komob yaambbed ambibkin koremdan kuu ben kimyen
abdon wenewen kowe kwamune kerewen.

²⁴ Ubbed God ye profesi weng wengambere dakmidaniib God
ye karadmodaniib okad yimin yimin yaambbed yeewe

dukniwendaniib yi umkan kubudoroon kuu God kuu wedmoon.”
 andoon.

Ewen Ari Doriibdanbed God Yaningko Kankooniwen

19 ¹Kwanoone wengambaraane, Ewen aombed kadaareb yemooon
 naawonmo baandimaib ye kuweng areb kwane komke
 yedmiwen,

“God yaningko kankoonem!

Bobni yaa burudande bindiyiib nambiriyiib aromkonoyiib kuu nub
 God yeman,

² amborom kuu ye wengyundi kuu anammo yorokmo kowe.

Nenem awaan wonong, yu nenem inamen abdonbed okad yiridan
 ben amonombe abdon kerundeen kuu,

Godbed wengyunde yu yaa dabab kondoon.

Yumbed ye deme karub yenbanduune dukniwe yi umkan
 kubudoroon kuye dowad

yembed man inande dabab kondoon.” andiwen.

³Kwane yimbed angkon ika komke yedmiwen,

“God yaningko kankoonem!

Yu amareng ku daanebeen kuu aron korem korem yeman kii.”
 andiwen.

⁴Kwane, aamkono aamkono wad kaningiib wad doriib ye dingkan
 kaningiib kuu God yaa ye ooni ye dibirimbon arimbed dibeen kuyaa yiri
 bumangke korok benkibingke baande yedmiwen,

“Anam kwanok. God yaningko kankoonem!” andiwen.

⁵Kwanoone God ye ooni ye dibirimbon yaambed wengmo menebe
 yedmoon,

“Ye demedan, aningko embengiib darewoowiib ye yaa uniwendan,
 yiib korem kuu nub God yaningko kankoonem!” andoon.

⁶Kwane wengambaraane, kadaareb yemooon naawon baandi arewiib ok
 benbon ye kuweng arewiib amkuni darewoob ye kuweng arewiib kwane
 komke yedmiwen,

“God yaningko kankoonem!

Amborom kuu nub Yariman God Aromkono Ariyiib kuu korok
 kere oone doreen kowe.

⁷Kubi darewoob kerenub God yaa kubenenub ye yaa nambiri konem!

Amborom kuu Sibi Mana awani ye orok yaron munuune,
 awani ye wonong kuu yukareb nekwane dowan kereen kowe.

⁸Ebkad amun yeman kawanmo dangkorong koroomiibban kuu,
 yu inwari dowad bangkandiwen.” andiwen.

Ebkad amun yeman kawanmo ye id kuu God ye karadmodan kami
 yorokmo ambangkiwen kui.

⁹Kwane, engyumbed ne yaa yedmoon, “Wongke, ‘Kane kane Sibi Mana ye awani orokbon yaa ani yeman baandoondan kuu amun kerundoon kiii!’” andekore ika yedmoon, “Weng kee God ye weng anam.” andoon.

¹⁰Kuyaambed ne kuu engyu ye yon yiri bumangke korok kankibineni yaningko kankoonande kamaan kumban, yembed yedmewoon, “Kwamaab! Ne kuu eb areb, eb angkodmia Yesu ye weng awinimaibdan areb, nub kuu ibmo, God ye demedan kui. God yaningko kankoone! Amborom kuu Yesu ye weng dakme korokbi kuu profesi weng ye inamen ye id kowe.” andoon.

Yesu Hoos Kawanmo Arimbed Nangmok Wonoon

¹¹Kwane wedmaane, Ewen kuu nandoone hoos kawanmo wedmaane, kwarimbed dibere yarebimaan ye karub yaningko kuu Ma Korondiyiibban angkon yaningko maa kuu Anammo. Ye kuu inamen yorokmombed wengyundane nangbanean. ¹²Ye indob kuu amot yumbu areb, kwane ye korok ari kuu king ye korok ari debi yeman kwamune yemooniib. Ye korok ari kuu aningkoyiib wongkoon, kumban karub maa kuu kaadkerindeban, yembedmo yekaad. ¹³Ye ebkad doboob derenoon dungkun yirimo kuu umkan aom kamoon. Ye aningko kuu God ye Weng. ¹⁴Ewen aom ana nangmidan kuu ye yoman weniib, ebkad amun yeman kawanmo koroomiibban inwarenib hoos kawanmo arimbed ye yoman weniib kui. ¹⁵Kwane, ye mongkodkono aombed kerewang arudiib kumbed kakumundin yenbandi yeman angkadereen. Ye kuu king ye aromkono yobdoodmo kwamune areb yi yaa oonaneen. Kwane, nong yob beengke ambodmo kandemoon areb, yembed Aromkonomo Ye God ye arud miin darewoob kuye ambodmo kandaneen kumbed, ambarakmidan yaa bangkandaneene ananiib. ¹⁶Ye ebkad doboob yaayiib yon muudkuk yaayiib kuu aningko keane wongkiwen,

KING KOREM YI KING,
YARIMAN KOREM YI YARIMAN.

¹⁷Kwane wedmaane, engyu maa kuu aron nambiri aom doreen kumbed on ambid aom dewenebiib yaa naawonmo baande yedmoon, “Minime, mimyamo kerenib God ye orok darewoobbon derebime. ¹⁸Yiib kwananiib kuu kingiib ana nangmi korok korokiib aromkonomo ana nangmidaniib hoosiib hoos kwarimbed dibere yarebimaibdaniib yena yi dabderem yiri dobere no deme awinembiridaniib yika oonimaibdaniib aningkoyiibdaniib aningkoyiibbandaniib nimakarub korem yi bob kuu bunge anime.” andoon.

¹⁹Kwane wedmaane, arud dingkaniib okad yiridan yi kingiib yi ana nangmidaniib kuu mimyamo kere hoos kawanmo kwari dibere yarebeen ye karub yoom ye ana nangmidan yoom yaa nangbande kamiwen.

²⁰Kumban arud dingkan kuu nen awineniwen. Dudi profesiman arud

dingkan ye dowad dud yeka maaaa kedmengkanaboon kuu ye kangkon nen awineniwen. Keye karub kee dud kedmengkoon kembed nimaya karuwa arud dingkan ye kumun kuu yi binad o dingki yaa kandekorib ye kuruwak ongmawen yaa bumangke yaningko kankoonimaibdan kuyaa birande ben abdon wonoon kui. Arud dingkaniib dudi profesimaniib, yi ayooob kuu bobnaibban wad bene bot sulfaambed amot denembiri ye bowan yiri kiradmoon. ²¹Kwane ana nangmidan yena korem kuu hoos kwarimbed dibere yarebimaan ye karub ye mongkodkono aombed kerewang angkadereen kumbed yenbandoone dukniwen. Kwaniiwe, onbed menebe yi bob id kuu berewariwen.

Weeb 1,000iib

20 ¹Kwane wedmaane, engyu kuu Ewen aombed kamoonon, ye dingki yaa kuu dem kongdem yiri ye kiiyiib sein darewoowiib awingkoon. ²Arud ye yi kedbon, unyemanbed mene kibik doreen ye awad arewa Seten kui, ye kuu engyumbed awinenekore, weeb 1,000iib dohiri yeman seinbed yenbenoon. ³Kwane, engyumbed nen dem kongdem yiri korarekore, animari kebene karangme ongmoon. Kwanoon kuu Setenbed nimakarub yaa birandembaraan anded kwane wene weeb 1,000iib dowan keruked. Kwananuune ye kuu aron doboobban domonenaneene ari yaro dobaraneen.

⁴Kwane wedmaane, wengyundi ye korok korok yi ooni ye dibirimbon ari kuu wengyundi ye aromkonoyiib kondoondan kuu dibiib. Kwane, anukbed nimaya karuwa Yesu ye weng daande korokbendenib God ye weng dakmiwen kumbed yenambed korok wanabiwe dukniwendan yi kingkin kuu wedmendaan. Yi kuu arud dingkaniib ye kuruwakiib yaa ma bumangke aningko kankoonindo, angkon yi binad ari o yi dingki yaa kuu ye kumuniib bindo. Kwane, yi kuu dukniwen yirimbed ika wadkere dembekorib, Yesu Keresu yoom korok korok kere weeb 1,000iib oone dobaraniib. ⁵Kekee ibduruk bobni yirimbed ika dembi yeman kui. Nimakarub dukniwen yena kuu dukniwen yirimbed ika wadkere dembaibban, kwane wene weeb 1,000iib dowan keranuunkob. ⁶Kane kane ibduruk arimbed ika dembaniib kuu karadmo amun kerundaneen. Kwane, ika bobni yaromkonombed yi ma yenbandaane duknaibban. Angkon yi kuu God yoom Keresu yoom dore nimakarub dore wedyiri dobiridan kerenib ye yoom korok korok kere weeb 1,000iib oone dobaraniib.

Seten Ye Dobirimbon

⁷Kwane wene weeb 1,000iib dowan keranuun kwarimbed Seten nen wii aom kwoon kuu domonenaneene dembene yarebaneen. ⁸Kwane yarebaneen kuu okad yimin yimin kangingiib kuyaa doriibdan, kukuu yi

aningko weng id angkara kuye aningko kuu Gogiib Magogiib kui, yi kuu birandaneen, Godiib yaa bon kere nedbe ana nangmi dowad. Yi korem kuu yemoon, karamok kebed yaa kubuk kimingkindeban kwamune areb. ⁹Kwane, okad yimin yimin yaambad menebenib, God ye mimyob dowaken kerundoon ye siti, ye karadmodan kuyaom doriib kuye siti yaa awanewandiwen. Kumban Ewen arimbed amot kamenene denende dowan keroon. ¹⁰Kwanoone, yi yaa birandoon ye awad arewa kuu nen bot sulfaambad amot denembiri ye bowan yiri koraroon, kwane arud dingkaniib dudi profesianiib ben kiradmoon ye bowan yiri kui. Kwane, yi kuu awingyawiib amnoomiib durud yewed kandembaraniib aron korem korem.

Yeenbon Wengyundi

¹¹Kwane, king ye ooni ye dibirimbon kawanmo darewoob ari wedmaane, God kuu kwarimbed dibeen. Ye kerebiri arimbed okadiib ambidiib kuu kirokmoniwen. Kwane, yi yumboniibban keriwon. ¹²Kwane wedmaane, dukniwendan aningkoyiib aningkoyiibbaniib kuu ye arinambo ari doriibe, buk kuu daadmenaboos. Buk mamaa daandoon kuu wadkeri ye buk. Dukniwendan kuu yimbed komo kamiibkob buk daadmenaboos kuyaa anuk wongkanaboos kuu kwamunemo wengyundandoon. ¹³Karamok angkambad dukniwendaniib okad yirimbed dukniwendaniib kuu kuyaambad dembe menebiibe, yoworiwenbondaniib kwangkon kuyaambad dembe menebiibe, yi mimim korem kuu komo kamiwen kuu kwane wengyundandoon. ¹⁴Kwane, bobniyiib yoworiwenboniib kuu amot denembiri ye bowan yiri kiradmoon. Amot denembiri ye bowan kuu bobni ayoo andi yeman kui. ¹⁵Kane kane yi aningko wadkeri ye buk aom wongkindo kuu amot denobembiri ye bowan yiri ben kiraneen.

Yerusalem Yeeb

21 ¹Kwane, ambid yeewiib okad yeewiib wedmaan, amborom kuu ibduruk ye ambidiib okadiib kuu dowan kereen kowe. Kuyaa kuu karamokiibban. ²Kwane wedmaane, Karadmo ye Siti, Yerusalem yeeb Ewen aom Godiib yaambad karub awani ye dowad wonong manimanandeb inwaremoon kwamune areb kumbad kamuneen. ³Kwane wengambaraane, God ye ooni ye dibirimbon aombad wengmo naawonmo dakmoon, “Kibikee God ye dobirimbon kuu nimakaruwiib yaa angkimbaraneen. Kwane, yiyiib yaa dobaraneen. Yi kuu God ye karuwa nimaya keraniibe, God yeka yiyiib yaa doberene yi God keraneen. ⁴Yembad yi inok korem yi indob yaa kuu araneen. Kuyaom kuu bobniyiibban mimyob wandiyiibban amengiibban yewediibban aron korem, amborom kuu kurin ye dohiri kerekmen kuu dowan keroon kowe.” andoon.

⁵Kwane, Godbed ye ooni ye dibirimbon arimbed yedmoon, “Kedi, kumkam korem kuu yeeb ongmenabaan kii!” andoon. Andekore yedmoon, “Weng kee anammo, ne kuu ma korondainban kowe, wongke.” andoon.

⁶Kwane yembed ne yaa yedmoon, “Kuned kuu dowan keroon kii. Ne kuu Ibduruk Doboroon Ye God, angkon Yeenbon Dobaraneen Ye God, ne kuu Andowoon Ye God, angkon Yimin Wandaneen Ye God kii. Kanembed ok moom bobnaneen kuu nembed wadkeri ok dewenebuun yaambd munobmo konaniin. ⁷Kanembed ninabe burudandaneen kuu korem kee yeman keraneene ne kuu ye God keraniine ye kuu ne dana keraneen. ⁸Kumban undeeddaniib anam andindodaniib komyeng kamenabidaniib kumka kuman yenbandidaniib nenem kamenabidaniib waruk komobdaniib dudi god yi kuruwak yaa bumangkimaibdaniib dudanabidan koremiib yi dobirimbon kuu bot sulfaambd amot denembiri ye bowan yiri. Kekee bobni ayoob andi yeman kui.” andoon.

⁹Kwane, yeenbon dabab kondi yeman ediib meneki wongdem ediib aombd anukbed ondukniwen ye engyus ediib kuyaom mamaambd mene ne yaa yedmoon, “Menebko, Sibi Manambd awanandameen ye wonong kuu korokbedda.” andoon. ¹⁰Kwanekore, Kingkinbed ibnewe nendore aangko ambab ari nenwenene, Karadmo ye Siti, Yerusalem kuu Ewen aom Godiib yaambd kamenuun kuu korokbewoon. ¹¹Kuyaa kuu God ye nambiriyiib yuroon. Siti kuyaa kawuroon kuu bot yeka mamaa miin manimanandeb areb, omkadmo ye bot yaspee areb, ok karadmo areb. ¹²Siti kuuk kuu darewoob ambab ari kumbd ambongko kuu wad ayoowiib. Kuyaambd engyus wad ayoowiib kuu ambongko kuyaambd doriib. Ambongko mimim kuyaa Israeldan yi amyenimbon aningko wad ayoowiib kwane wongkiwen. ¹³Kangka kee ambongko ayoobmim, kari kangkon ambongko ayoobmim, kiri kangkon ambongko ayoobmim, kaom kangkon ambongko ayoobmim. ¹⁴Siti kuuk yimin yiri dedmobe dariwen ye bot kuu wad ayoob. Kuyaa wongkiwen kuu Sibi Manambd kinoona apaso keriwendan wad ayoob yi aningko wongkiwen.

¹⁵Engyu ne yoom dakmuwen ye karub kuu sitiyyiib ambongkoyiib kuuk wiriniweniib kumunkingki yeman goldbed ongmiwen kumbd awinoon. ¹⁶Siti kuu darewoob kumbd bendom kuu kaningiib. Kwane kumunkingke wedmoon kuu ye doboowiib ye darewoowiib ye ambab ariyyiib kuu 2,200 kilomita. ¹⁷Kuuk wiriniwen ye nomkono kuu dodkanmo wene kimingkane 240 kerimaib kwamune areb engyumbd kumunkingkoon. ¹⁸Kuuk kuu yaspeembd ongmoon, kwane siti kuyaom kuu goldmo ongmoon, ok karadmo yaa dianmo wedmimaub kwamune areb. ¹⁹Siti kuuk yimin yiri dedmobe dariwen ye bot kuu manimanandeb ye bot maa maa korembd inwarundoon. Bot ibduruk kan dedmone maniwen kuu bot yaspee, angkon bot mamaa ayoob

andi kuu ambidkadmō ye bot safaiya, bot mamaa ayoobmim andi kuu awoyeebkadmō ye bot eget, bot mamaa kaning andi kuu awoyeebkadmō ye bot emerald, ²⁰bot mamaa angko andi kuu kubukkadmō ye bot oniks, bot mamaa kung andi kuu mongkodkadmō ye bot kaanilien, bot mamaa ed andi kuu denekkadmo ye bot kurisolait, bot mamaa kob andi kuu wiibkadmō ye bot beril, bot mamaa 9 andi kuu wubmo ye bot topas, bot mamaa 10 andi kuu awoyeebkadmō ye bot kuraisofres, bot mamaa 11 andi kuu binmo ye bot yasin, bot mamaa 12 andi kuu minodminodmo ye bot ametis. ²¹Ambongko wad ayoowiib kuu bot kawanmo yaningko peelmbed ongmīwen. Ambongko mimim kuu peel mimombed ongmenabiwen. Kwane, siti ye kiwaan darewoob kuu goldmo ongmoon, ok karadmō yaa dianmo wedmimaub kwamune areb.

²²Kwane, ne kuu siti aom kurikuri ambib kuu ma wedmindo, amborom kuu Aromkono Ariyiib ye Yariman God yoom Sibi Mana yoom kuu kuye siti ye kurikuri ambib kowe. ²³Siti kuyaom kuu aron o wood yi nambiriyiib yurimokban, amborom kuu God ye nambirimbed siti kuyaom yurembirimaan, kwane Sibi Mana kuu lem areb siti kuyaom yurembirimaan. ²⁴Kuye nambiri yurembirimaan kumbed ambibkin mimim koremdan kuu yaraniib, kwane okad yiridan yi king kuu God ye nambiri kandiweniib kuu kuyaom be menebaniib. ²⁵Kuye ambongko kuu kebenaanban, aron korem kwane daandembaraneen, amborom kuu kuyaa kuu mirikniyiibban kowe. ²⁶Ambibkin mimim koremdan God ye nambiri kandiweniib aningko darewoob arimbed koni yemaniib kuu kuyaom be menebaniib. ²⁷Kumban God ye dowakenban ye yiribmaniib keyaom ma be menebaibban. Kwane komyeng kamenabidaniib dudanabidaniib kuu ma awunaibban, kane kane yi aningko Sibi Manambed ye wadkeri buk aom wongkoondan kumbedmo awunaniib kii.

Wadkeri Ye Ok Awaan

22 ¹Kwane, engyumbed ne yaa wadkeri ye ok ok awaan korokbewoon. Ok kuu karadmō anam menengmenengiib kamenu God yoom Sibi Mana yoom yi ooni ye dibirimbōn yaambēd menebenu, ²siti kiwaan darewoob wedyirimbed wenebuun. Ok wedyiri kuu wadkeri ye ayiib doreene ok kuu at ye dabderem yiri dewenebuun. At kuu yob yeka maa maa wad ayoowiib ire winimaan. Wood mimo mimo aom kuu yob yeka mamaa mamaa ire winimaan. Ye bid kuu ambibkin mimimdan yi bob anikad ongmenabendi yeman. ³Kuyaom kuu God ye butuniib ma angkimbaraanban. Siti kuyaom kuu God yoom Sibi Mana yoom yi ooni ye dibirimbōn angkimbaraneene, ye demedan kuu ye yaa kurikuri ye deme awinaniib. ⁴Yi kuu ye murubia wedmenaniibe, yi binad ari ye aningko wongkanabaneen. ⁵Kuyaom kuu kumuniibban. Kwane, yi kuu lemiib aron ye nambiriyiib yaa meenaibban, amborom kuu Yariman

Godbed nambiri kuu kondaneen. Kwane, yi kuu aron korem korem oone dobaraniib.

⁶Kwane, engyumbed ne yaa yedmoon, “Weng kee anammo, God kuu ma korondaanban. Yariman, profesi weng ye inamen profesidan yaa kondimaan ye God kui, yembed ye engyu yedmoonkob mene ye demedan yaa aron doboobban ari komarewa kamenabaneen ye kerekmen kuu korokbendoon.” andoon.

Aron Doboobban Ari Yesu Mananeen

⁷Kwane, Yesumbed yedmoon, “Kedi, ne kuu aron doboobban ari mananiin kii! Karub kanembed profesi weng buk keyaombed dakmeen yaa awine kandaneen kuu Godbed amun kerunaneen.” andoon.

⁸Ne kuu Yoon, nembed kumkam kee wedmeni wengambaran. Kwane wengambere wedmendekori, kedmengkawoon ye engyu ye yon yiri bumangke korok kankibineni kurikuri kerande kamaan. ⁹Kumban yembed ne yaa yedmewoon, “Ne yaa kwane kamaab! Ne kuu eb yoom eb ambanga profesidan yoom weng buk keyaombed awine kandiwendan yoom kwamune areb, ne kuu deme ye karubmo. Kowe, God yaambad bumangke kurikuri kere!” andoon.

¹⁰Kwanandekore yedmewoon, “Buk keyaom profesi wengiib kuu kebene biknaab, amborom kuu aron kuu dia kereen kowe. ¹¹Aron kuu dia kereen kowe, kanembed ambarakmimaan keroka, domonenibko kwane kamemborok, kanembed arewa ye niindem aom doberembirimaan keroka, domonenibko kwane doberemborok, kanembed yorokmo kamenabimaan keroka, domonenibko kwane kamemborok, kanembed karadmo doberembirimaan keroka, domonenibko kwane doberemborok.” andoon.

¹²Kwane, Yesumbed yedmoon, “Kedi, ne kuu aron doboobban ari mananiin kii! Ne kuu kakmaniib, nembed bemeneni mimim korem yaa komarewa ambangkiwen kuu kwamunemo kakman bangkandaniin. ¹³Ne kuu Iduruk Daboroonman, angkon Yeenbon Dobaraneeenman, ne kuu Andowoonman, angkon Yimin Wandaneenman kii.

¹⁴“Kane kane yi ebkad doboob giwen kuu Godbed amun kerundoon. Kwaniwen kumbed Godbed yi yaa wadkeri ye at yaa wene ani kuu yimin, siti kuuk ambongko awuni kuu yimin yedme kowoon. ¹⁵Kumban siti bunangka kuu komyeng kamenabidaniib waruk komobdaniib nenem kamidaniib kumka kuman yenbandidaniib dudi god yaa bumangkidaniib dudanabi yaa dowaken kere kamimaibdaniib doriib.

¹⁶“Ne kuu Yesu, nembed ne engyu yedmaane menene weng kee anam andiwendan yaa daandi ye dowad kondoon yiib yaa. Ne kuu Dewid Ye Ambokab, Dewid Ye Awo kui, kwane ne kuu Amkimo Ye Mindong nambiri darewoowiib kii.” andoon.

¹⁷Kwane, Kingkin yoom Sibi Mana yaa awanandamuun ye wonong yoombed yedmiwen, “Minime!” andiwen. Kwane, kanembed weng kee wengamboroon kuu yena yaa “Minime!” andok. Kanembed ok moomiib keroka monok. Kanembed dowaken keroka, mene munob ye wadkeri ok kandok.

¹⁸Profesi weng buk keyaombed wengambiriwendan kuu, yiib korem yaa ongakandi weng ke yedmaan kei. Kanembed weng keyaa weng yena ariyiib daboknaneen kuu, Godbed dabab weng buk keyaom dakmoon kwamune ye yaa ariyiib dabab dabokne konaneen. ¹⁹Kanembed profesi weng keyaambded weng yena dankaraneen kuu, wadkeri ye ayiib siti karadmoyiib yi weng dakmoon kowe, Godbed karub kuu wadkeri ye at yaambded ani ye yumbon aomiib siti aom aomni ye yumboniib yaa kuu dankaraneen.

²⁰Kumkam keye dowad dakme korokboon ye karubbed yedmoon, “Eyokee, aron doboobban ari mananiin.” andoon.

Anam kwanok. Yariman Yesu, mene.

²¹Yariman Yesu ye kabamoonmo kondoon ye mimyob dowaken kuu God ye nimakarub yaa kerok. Anam kwanok.